

漢書地理志補註

卷之

漢書地理志補注卷四十

豫章郡

常熟 吳卓信 編纂

水經注——春秋屬楚卽令尹子蕩師于——者也秦
 以爲廬江南部漢高祖六年始命灌嬰以爲——治南
 昌城卽灌嬰所築也城之南門曰松陽門門內有樟樹高
 七丈五尺大二十五圍枝葉扶疎垂陰數畝應劭漢官儀
 曰——樟樹生庭中故以名郡矣 方輿紀要按漢紀景
 帝初議削吳——會稽郡則——爲吳地或曰南境屬長
 沙也 大清一統志按左傳昭公六年楚子蒲帥師伐吳
 師于——又定公四年吳子舍舟于淮汭自——與楚師

夾漢杜預注——漢東江北地名據此則古——地在淮南江北之界漢始移其名于江南 地理志稽疑——楚漢之間分廬江置漢因之見灌嬰傳亦見英布傳水經注曰——本秦廬江南部地蓋秦之九江郡治廬江也然則項氏先分廬江而——又自廬江而分也 又云吳淠傳中之——皆鄣郡之訛韋昭言之甚詳胡梅磻乃曰——分鄣郡置甚哉其妄也 春秋大事表左傳——凡六見其地極廣蓋——係寬大之語自江西之饒州南康二府西抵九江府之德化盡鄱陽之境隔江為江南安慶府之宿松北接潁亳廬壽西接光黃皆為楚之——地跨大江南北以及淮南蓋鳳陽以西壽霍光固之境皆近淮孺

為吳楚日交兵處今日但以江西為——乃漢——非春秋時——地也秦滅楚置九江郡漢分九江置——乃遙取春秋之——為名如會稽本在浙東而秦漢之會稽郡則盡浙西之境也 按漢——今江西南昌府之南昌縣及寧州饒州府之鄱陽餘干二縣南康府之建昌縣九江府之德化德安湖口三縣建昌府之南城縣臨江府之清江縣吉安府之廬陵安福二縣瑞州府之高安縣袁州府之宜春縣贛州府之贛雩都二縣南安府之南康縣皆其地

高帝置

地理志稽疑——故屬秦九江郡楚漢之際分置郡屬九

江國高帝五年因之屬淮南國文帝六年復為郡十六年復屬淮南國武帝元狩元年復故

莽曰九江屬揚州縣十八

南昌廬陵彭澤鄱陽歷陵餘汗柴桑艾贛新塗南城建成宜春海昏雩都鄒陽南壆安平

南昌

王子侯表——侯宇河間惠王子 梅福傳補——尉

水經注贛水又北逕——故城西縣即郡治也 又云盱

水逕——縣南西注贛水 豫章記江淮惟此縣及吳臨

湘三縣是也 通典今洪州所理——縣及豐城縣並漢

——縣地 寰宇記——山在今——縣西二十五里高

二十丈周回二百里 大清一統志——故城在今——

府——縣東 按——自漢迄五代皆縣名也唐乾元中

始置——軍尋廢至南唐乃置——府王子安——故郡

一語與歷代地理志不符不知何所據也

莽曰宜善

廬陵

水經贛水又西北過——縣西注云十三州志稱廬水西

出長沙安復縣東至——入湖漢水也 元和志今吉州

——永新太和三縣並漢——縣地 寰宇記——故城

在今縣南一里太和縣北三十里 太清一統志——故

城在今吉安府——縣南

莽曰桓亭

彭澤

水經贛水又北過——縣西 元和志今江州——縣本漢舊縣故城在今都昌縣北四十五里晉陶潛爲令理此城 寰宇記——城在都昌縣西北二十里 大清一統志——故城在今九江府湖口縣東三十里縣志云今爲——鄉故縣里 方氏通雅古——縣在今湖口縣東三十里漢置晉隋因之凡彭蠡而北大孤而東皆其地也唐武德五年改——爲浩州遷于浩山下至今湖口九都號五柳鄉八都號——鄉有三學寺祀淵明有洗墨池玩月臺吳草廬爲記南唐始析五柳——二鄉之地爲湖口縣今以小姑山之——縣爲淵明解綬之地則非矣

禹貢彭蠡澤在西

禹貢彭蠡既豬 又云東匯澤爲彭蠡 史記吳起傳昔

三苗左洞庭右彭蠡 水經沔水自江夏沙羨縣北南入

于江與江合流又東過彭蠡澤注云尙書禹貢匯澤也鄭

冬日匯同也漢與江鬪轉東成其澤矣 括地志彭蠡湖

在江州潯陽縣東南六十里 唐六典彭蠡湖一名宮亭

湖俗謂之鄱陽湖在南康軍星子縣南江州彭澤縣西

蕭該漢書音義彭蠡古作彭麗 今水經彭蠡湖一名鄱

陽湖一名宮亭湖在九江府城東南四十里闊四十里長

三百里經南康府東南西接南昌東抵饒州納贛盱鄱饒

表修諸水北流入于江 禹貢錐指彭蠡澤後稱彭蠡湖
在今江西南昌府城東北一百五十里饒州府城西四十
里南康府城東五里九江府城東南九十里周回四百五
十里浸四郡之境亦曰鄱陽湖以中有鄱陽山而名俗因
號在都昌者爲東鄱湖在南昌者爲西鄱湖湖又隨地異
名在星子縣東南接南昌界者曰宮亭湖在都昌縣西南
者曰揚瀾湖又北曰左里湖在餘干縣西北者曰擔石湖
輿程記云自湖口縣入彭蠡湖經大孤山至南康府一百
二十里又二百五十里至南昌府自縣而東南渡湖抵饒
州凡三百七十里鄱陽山本名力士山亦名石印山東南
去鄱陽縣一百五十里漢爲歷陵縣地湖中又有康郎山

在餘干縣北八十里爲風帆之表幟春夏時湖水浩蕩無
涯及乎霜降水涸則贛川如帶而已此水自昔有南江之
稱鄭康成說三江云右會彭蠡爲南江南史王僧辯傳陳
霸先自嶺南起兵討侯景出南江行至湓口胡三省云贛
水謂之南江是也 大清一統志鄱陽湖在今南昌府新
建縣東北跨南昌饒州南康九江四府之境長三百里闊
四十里卽古彭蠡也一名宮亭湖隋時以接鄱陽山故又
名鄱陽湖 水道提綱鄱陽湖匯章貢諸水爲巨浸互南
昌饒州南康九江四府南昌新建建昌德安星子德化湖
口都昌鄱陽餘干十縣之境東西廣四五十里至百里南
北長三百里形如葫蘆中爲細腰卽南康星子之東南都

昌之西北也南曰宮亭湖族亭湖北曰落星湖曰左蠡湖
實一水也

鄱陽

孟康曰鄱音婆 韋昭曰鄱音蒲何反 後書雷義傳注

一一縣城在今饒州一一縣東 括地志饒川一一縣春

秋時為楚東境秦為番縣屬九江郡 元和志今饒州郭

下一一縣本秦置漢因之以在鄱水之北故名又浮梁縣

亦一一地 寰宇記一一縣本秦番縣也即漢番君吳芮

所居之城在彭蠡湖東鄱水之北 大清一統志一一故

城在今饒州府一一縣東舊志云在縣東六十里今名故

縣鎮一一山在縣西北一百十五里一一湖中 按左傳

定六年吳伐楚取番番即一一春秋時鄱地極大不止今

一縣也寰宇記引本志云番陽屬豫章郡後漢加邑作鄱

則知今鄱字乃後人從續志所增高帝紀番君吳芮陳涉

傳番盜英布並引蘇林注云豫章番陽縣此尚從舊本作

番未改也

武陽鄉右十餘里有黃金采

史記東越傳聞越王弟餘善發兵距漢入白沙武林索隱

曰今豫章北二百里接一一界地名白沙沙東南八十里

有武陽亭亭東南三十里地名武林今當閩越入京之道

又貨殖傳豫章出黃金然厪厪物之所有取之不足以

更費更償也 王隱晉書一一樂安出黃金鑿土十餘丈

披沙沙中所得者大如豆小如粟米 水經注武陽鄉地
有黃金采 師古曰采者謂采取金之處 通典一一郡
貢麩金十兩 方輿紀要武陽城在饒州府東五十里
大清一統志一一縣志云古武陽亭在今縣東五十里
鄱水西入湖漢

水經注鄱水出一縣東西逕其縣南又西流注于贛
寰宇記浮梁樂平餘干等三縣水合爲鄱江經郡城南又
過都昌縣入彭蠡湖 今水經鄱江源出浮梁縣東北一
百四十里榔本山下西流百里至浮梁縣南爲昌江又西
樂安江來注之下流經饒州府城南門外爲鄱江環城流
至西北復分爲二俱入于彭蠡湖 方輿紀要鄱江在今

饒州府城南門外其上源一自江南婺源縣匯諸山谿水
流經德興樂平二縣界一自江南祁門縣會諸山谿水流
經浮梁縣界入一一縣境復會流而西至城東門又經城
南而廣信以西之水皆流會焉環城流至西北復分爲二
俱入一一湖一名雙港水 大清一統志鄱江在一一縣
南一名長港樂安江自東南來昌江自東北來又分二支
名雙港分流入一一湖 皇朝通志鄱江卽古番水源出
安徽婺源縣北西南流入江西界經德興縣北又經樂平
縣東有大谿自婺源德興縣來會至饒州府治一一縣東
南有餘水自萬年縣來會又北有昌江自祁門黟縣經浮
梁縣來會又西南有西湖水來會入鄱陽湖 水道提綱

鄱江卽古鄱水有二源一曰婺河一曰大共水婺河源出
徽州府婺源縣北之大廣山西南流經縣城東南曰婺河
又西南入江西界經德興縣北又西南經樂平縣東曰樂
安江又西經樂平縣城南又西南折西北至饒州府治一
縣東南會祁門來之昌江大共水源出徽州府祁門縣
縣北之大共山南流經縣東北又西經縣城南又西南曰
南河又西南入江西界經浮梁縣東北又西南經城東南
又西過界牌鋪南曰昌江又西南經府東北又西至府城
東南而婺河自東南來會二河旣合曰鄱江西經府城南
又西南入一一湖源流七百里亦豫章十川之一也 新
校地理志鄱水今婺河也源出婺源縣北大廣山

莽曰鄉亭

歷陵

通典今江州潯陽縣有蒲塘驛卽漢一縣也王莽改爲
蒲亭 寰宇記一一縣今江州德安縣也卽蒲塘置 方
輿紀要一一城卽今九江府德安縣治春秋時爲楚之東
鄙名蒲塘 大清一統志一一故城在今九江府德安縣
東

傅易山傅易川在南古文以爲傅淺原

禹貢過九江至于敷淺原孔傳敷淺原一名傅陽山 師
古曰傅讀曰敷易古陽字 通典蒲塘驛前有敷淺原原
西數十里有博陽山 史記集解傅淺原一名博陽山古

字傳博敷皆通用 寰宇記傳易山在德安縣南十三里
敷淺水常流不絕色頗清冷其源接遂昌縣及鄂州永興
界屈曲餘二百里方至縣 朱子九江彭蠡辨說者以敷
淺原爲漢——縣之傳陽山在今江州德安縣爲山甚小
而卑不足以有所表見而其全體正脈遂起而爲廬阜則
甚高且大以盡乎大江彭蠡之交而所以識夫衡山東過
一支之所極者惟是乃爲宜耳 蔡氏書傳敷淺原今江
州德安縣傳陽山也晁氏以爲在鄱陽者非是晁氏以鄱
陽有傳陽山又有歷陵山爲應地志——縣之名然鄱陽
漢舊縣地不應又爲——縣山名偶同不足據也江州德
安雖爲近之然所謂敷淺原者其山甚小而卑亦未見其

爲在所表見者惟廬阜在大江彭蠡之交最高且大宜所
當紀志者而皆無考據恐山川之名古今或異而傳者未
必得其真也 禹貢錐指古文以——之傳陽山爲敷淺
原當有所本今欲知山在何處必先明縣在何境通典云
江州潯陽縣有蒲塘驛卽漢——縣也驛前有敷淺原原
西數十里有傳陽山予按唐武德八年于潯陽縣置蒲塘
驛後改爲塲五代時楊吳升爲德安縣今治故驛也杜佑
以驛爲漢——縣不知何據豈因王莽改——曰蒲亭而
遂以蒲塘附會卽黃子鴻嘗爲之辨曰漢志豫章郡領——
縣晉志——與餘汗鄡陽俱割屬鄱陽郡而柴桑則屬
武昌郡不應——反出柴桑之西也因謂晁氏以——在

鄱陽者爲是且曰吳志一一有石印山卽今饒州府之鄱陽山亦一一在鄱陽之一證也今按鄱陽山在鄱陽縣西北一百五十里鄱陽湖中亦名石印山鄱陽縣故城在今府城東六十里三國吳至隋皆爲鄱陽郡治唐移于今所然則府城西當卽爲故一一地敷淺原蓋在鄱湖之西落星之畔也說文原高平之野人所登原固有山休故謂之傅陽山杜氏析山與原爲二處非也 又云朱子之意以廬阜爲敷淺原然此山高峻似不可名之曰原金吉甫云敷古文作傅傅陽山在廬阜之西南則是敷淺原之陽也蓋廬山雖高而其中原田連亘人民奠居所以有敷淺原之名是亦善解矣然原田連亘要不過山中高平之地耳若此者不一而足安得舉體而名之曰原王耕野云敷淺原恐非廬山高平曰原而又名敷淺則必平曠之地不爲高山可知近朱長孺亦云傅陽山漢志得之古文可據也朱子疑卑小不足表識釋敷淺之名正不當求之高大蓋傅陽在古本高平之地後人名之爲山耳導江漢之山至大別敷淺原而卽止者以江漢至此合流赴海不煩殫力隨刊況導水合舉源流可以互見豈必求之山脉盡處卽此說是也按水經注引孫放廬山賦曰尋陽郡南有廬山臨彭蠡之澤接平敞之原是廬山下固有平原也廬山盤蓋廣大其陽必有平敞之原但曠衍無奇選勝者所不道而志家又因仍舊說不能詳考指言其狀耳以此求之庶

不矢朱子之意而又卽以高山爲平原犯學者之所疑
準諸地望揆諸經旨視晁氏爲少優云 大清一統志傳
陽山在今德安縣南十二里博陽川在今德安縣治南一
名敷淺水 又云按朱子九江彭蠡辨以廬山爲敷淺原
語類云德安縣敷陽山正在廬山之西南故謂之敷陽非
以其地卽爲敷淺原也蔡沈金履祥夏允彝皆宗其說晁
氏則謂在鄱陽界今以都無確據且從舊說 水道提綱
博陽水出德安縣西南樟樹均東北經城南又東與東北
來之廬山水及諸溪會

莽曰蒲亭

餘汗

應劭曰汗音干

集韻——通作餘干

淮南人間訓始

皇使尉屠睢爲五軍南征一軍結餘干之水通輿今饒州
餘干縣漢——縣汗音干越王句踐之西界所謂干越也

元和志今饒州餘干縣本漢——縣淮南王曰田于——

是也縣因——之水爲名隋開皇九年去水存干名曰

餘干又樂平縣及信州弋陽縣並漢——縣地 方輿勝

覽——山一名羊角山兩峯面面相向狀如羊角天氣清

明望見廬山名勝志廣信府玉山縣東南二里有下干溪

東五里有上干溪二水合流經——干縣而與衢之常山接

溪源乾淺秋冬不通舟船故一名乾溪自信而衢不可舟

行而間以隆運者此而已矣 大清一統志——故城在

今饒州府餘干縣東北——山在縣東門外一名冠山一名羊角山 殿板漢書考證齊召南曰嚴助傳必先田餘干界中韋昭曰餘干越邑非也餘干即志所謂——屬豫章郡非越邑也越人先于餘干縣接界之地治田耳 春秋大事表江西饒州府為越之西界寰宇記云餘干縣西南有於越渡漢淮南王安獻議曰越人欲為變必先田——界中蓋今——縣以東連廣信一府皆漢——地國語止稱越地西至于姑蔑姑蔑為今浙江衢州府龍游縣由衢至饒中尚隔廣信府饒為越楚分界廣信之弋陽貴溪二縣本——縣地也——即於越為越之餘國語所稱殊未盡 漢書發伏漢書貨殖傳譬猶戎狄之與於越不相

入矣韋昭注云於越今餘十縣越之別名也則知汗干古字通非至隋始去水也

餘水東北至鄖陽

屬本郡

入湖漢

水經注餘水東出——縣北至鄖陽縣注贛水 寰宇記

——水自信州貴溪縣流入 明統志餘水在——縣治

前會縣之東南諸溪餘水故名以其三道而入又名三餘

或曰吳楚越之餘水也故名三餘 方輿紀要餘水在——

——縣治南亦名市湖中有越水餘水縣境諸水之總名也

北通鄱江南連龍窟河 大清一統志餘水在——縣南

卽今馮田西津諸水也縣志云卽安仁港水之支流 水道提綱餘水出萬年縣東北仙鶴山西南流經縣城東南又西北經城西南又西北至一一縣城西北有二溪合而南經城之西折而東經其南遂東北七十里來會卽餘水爲豫章十川之一者也又北流而婺河自東來會

莽曰治干

柴桑

山海經一一之山其上多銀其下多碧 周景式廬山記

一一彭澤之交古三苗國也 通典今江州潯陽縣有楚

城驛卽舊一一縣 隋志九江郡潯城縣舊曰一一大業

初改 元和志一一故城在今江州潯陽縣西南二十里

寰宇記一一山近栗里原陶潛此中人 胡三省通鑑

注劉宋昇明初尋陽時治一一今江州德化縣西南九十

里有一一山是也 方輿紀要一一城在今九江府南九

十里 江西通志九江府東北渡江五十里爲桑落洲昔

江水泛漲有桑流至此洲自植焉一一之名或本諸此

大清一統志一一故城在今九江府德化縣西南一一山

在縣西南九十里漢以此名縣

莽曰九江亭

艾

左傳哀二十二年吳會子慶忌出居于一一杜注一一吳邑豫章

有 一縣 後書桓帝紀注一一縣故城在今洪州建昌縣

寰宇記分寧縣有古一城 大清一統志一縣故城在今
南昌府寧州西州志云在州西百里龍岡坪

脩水東北至彭澤

屬本郡

入湖漢

水經脩水出一縣西東北注贛水注云脩水在一縣南東
流屈曲六百三十八里出建昌城又一百二十里其水總
納一川同臻一瀆俱注于彭蠡也輿地紀勝脩水在今分
寧縣西六十里東南流經舊縣經云脩水出豫章西北其
源自一城東北流六百三十八里至海昏又東流一百二
十里入彭蠡湖 方輿勝覽脩水在隆興府分寧縣西六

十里 大清一統志脩水源出南昌府寧州西東北流過
州南經武寧縣界又東入南康府建昌縣西南又東流一
百二十里合上僚水入章江注于彭蠡以其脩遠故曰脩
土人呼爲西河亦名脩江 皇朝通志脩水出寧州西南
與湖南界之幕阜山東北流有南樓嶺水來會又東北有
武寧縣水來會經武寧縣東南又經建昌縣東南有靖安
縣之長谿奉新安義縣之馮水來會分數派會贛江支渠
入鄱陽湖 水道提綱脩水亦曰修河亦曰西河源出寧
州西南與湖廣界之幕阜山兩源合而南流又東南又東
北折西北又東北至州西南又經州城東南又東北經武
寧縣城南折東南至建昌縣城南分爲二派並東北入鄱

陽湖源流行九百餘里亦豫章十川之一也 按修水水
經注作循水以字形相近而誤

行六百六十里莽曰治翰

贛

如淳曰音感 廣韻瀨縣名亦作贛 集韻瀨水名出豫

章或作贛贛瀨 通鑑釋文辨誤一縣如淳音感師古音

古暗反劉昫音古濫反獨廣韻作古送切史炤釋文從之

誤也一縣當章貢二水之會故合章貢二字爲一字若音

古送切則是指貢水爲縣名而遺章水矣 通典今虔州

所理一縣有章水貢水合流故曰一又虔化縣亦漢一縣

地 元和志虔州一縣貢水西南自南康縣來章水東南

自雩都縣來二水至州北合而爲一謂之一水因爲縣名

寰宇記漢高六年使灌嬰略定江南爲一縣立城以防

趙防今州西南益漿溪故城是也貢水西北流至一縣東

北與章水合章水從南康縣東北流合西扶良熱等水流

三十里入一縣郭與貢水合爲一水從縣北一百九十二

里入吉州泰和縣界 方輿紀要一城卽今一州府城

大清一統志一縣故城在今一州府一縣西南 地理志

稽疑按章貢圖經曰東江發源于汀州界之新樂山逕雩

都而會于章水西江導源于大庾縣之聶都山與貢水會

二水合而爲一則劉氏之言未可非也

豫章水出西南北入大江

海內東經聶都之山一水出焉東北流注于江 水經一
水出豫章南壑縣西北過一縣東又西北過廬陵縣西又
東北過石陽縣西又東北過漢平縣南又東北過新淦縣
西又北過南昌縣西又北過彭澤縣西北入于江注云山
海經曰一水出聶都山東北流注于江入彭澤西班固稱
南壑縣彭水所發東入湖漢水庾仲初謂大庾嶠水北入
豫章注于江地理志曰豫章水出一縣西南而北入江蓋
控引眾流總成一州雖稱謂有殊言歸一水矣雷次宗云
以此水爲其地名雖十川均流而此源最遠故獨受名焉
劉澄之曰縣東南有章水西有貢水縣治二水之間二水
合一字因以名縣劉氏專以字說水而不知失其實矣豫

章水導源東北流逕南壑縣北一川石咀水急行難傾波
委注六十餘里又北逕一縣東右會湖漢水又西北逕一
縣東西入豫章水也 輿地廣記一縣有一水東源出雩
都曰湖漢水西源出南壑曰彭水二水皆北流合于一縣
總爲豫章水北流入大江 輿地紀勝按章貢舊志云貢
水卽東江漢志名彭水章水卽西江漢志名湖漢水一水
蓋章貢二水之會也據此則章貢志以貢水爲東江至自
雩都而元和志乃以爲貢水發源大庾似指西水章貢志
以章水爲西江導源于南康之大庾而元和志乃以爲章
水東南來自雩都似指東水是貢水今爲東江而元和志
以爲西江章水今爲西江而元和志以爲東江其名混亂

然考諸漢志亦有所因漢志雩都有湖漢水南陜有彭水
元和志旣指章水爲湖漢水而漢志湖漢水載于雩都之
下則必以章水來自雩都勢必指以爲東水元和志又指
貢水爲彭水而漢志彭水載于南陜之下今南陜鎮尙隸
南安軍則必以貢水來自南安勢必指以爲西水二者名
字之差皆因漢志有湖漢水彭水之名而後人強合于章
貢二水以致相亂若以湖漢爲貢水以彭水爲章水則與
章貢志合矣 方輿勝覽東江發源于汀州界之新樂山
經雲都會于章山西江導源於南安大庾縣之聶都山與
貢水合會于上水二合水而爲一在州治後北流一百八
十里至萬安縣界由萬安而上爲灘十有八怪石如精鉄

突兀廉隅錯峙波面自一水而上信豐寧都俱有石磧險
阻視十八灘故俚俗以爲上下三百里磧石也 今水經

一江源自章貢而來貢水源出汀州新樂山西西南流經
瑞金南入會昌北濂水入之又西北流至雩都虔化水雩
水入之又西北流歛水北來入之又西北流三江水南來
入之

三江水在龍南縣後乃祧水混水濂水之會流經信豐入于章

又西北至一州府城

東爲貢水環城而北與章水合章水源出南安府大庾縣
西南一百三十里聶都山東流至南安府城南爲橫江經
南康縣治東北流猶水從西來注之至一州府城西爲章
江環城而北與貢水合名爲一江北流一百里凡二十四
灘怪石多險至萬安縣折而東流遂水西來注之過太和

縣東雲亭江東來注之北流至吉安州城東南禾水東流來注之又達吉安府城東吉水來注之又北流經峽江縣東至臨江府城南五里爲清江袁江水東流來注之又東北流入南昌府豐城縣南豐水來注之又東北流至南浦折而北流至南蜀江來注之又達南昌府城西爲章府城西爲章江又奉新江東流來注之章江又北流入于彭蠡湖方輿紀要一水在一州府城北其上源爲章貢二水貢水一名東江源出福建長汀縣新路嶺西經瑞金會昌及雩都南北諸川悉滙入焉又西北至一州府城東環城而北會于章水章水一名西江源出南安府聶都山一云出湖廣柳州黃岑山自宜章縣東流經崇義大庾縣及南康縣境亦會支川而東達府城西環城而北會于貢水自此名一水又北流三百里至吉安府又云豫水在南安府南康縣西南上源卽涼熱水流至縣之南樊口入章江所謂豫章水也禹貢錐指漢志豫章郡一縣下云豫章水出西南北入大江雩都縣下云湖漢水東至彭蠡入江又鄱陽縣有鄱水餘汗縣有餘水艾縣有修水南城縣有盱水建成縣有蜀水宜春縣有南水南野縣有彭水又長沙國安成縣有廬水皆入湖漢水湖漢水有豫章水源異而流同故志並云入江水經注則湖漢豫章總謂之一水劉澄之謂一縣東南有章水西有貢水二水合一字因以名縣酈元非之然後世皆宗其說以豫章爲章水湖漢爲

貢水二水合流爲一也 大清一統志章水源出南安府崇義縣聶都山東流過府東又東經南康縣南折東北入贛州府一縣界卽古一水亦卽豫章水亦名南江又名橫江 又云貢水源出福建汀州府西六十里新樂嶺西流經江西贛州府瑞金會昌雩都三縣又西入一縣界與章水合一名東江又名會昌江卽古湖漢水也 又云一水在今一州府一縣北章貢二水於此合流謂之一江又北流三百里入吉安府南萬安縣界又東北六十里經泰和縣東又東北八十里經廬陵縣南又西四十五里經吉水縣西又東北入臨江府經峽江縣南又東北經新淦縣西又北流入清江縣界至縣北合袁水又北入南昌府豐城

縣界經縣西又北經南昌縣界又北經新建縣界又北注鄱陽湖 皇朝通志章水源出湖南郴州桂陽縣東東流入江西南安府界經崇義縣西北又經上猶縣西南又經南康縣北至一州府治一縣西南有池江自安南府大庾縣經南康合諸水來會至一州府西北貢水來會貢水卽古湖漢水源出福建汀州府長汀縣西北西流入江西瑞金縣界經會昌縣東北有雁門水自長寧縣來會又西北有梅村江自安遠縣來會經雲稱縣東南有梅川水自寧都州合石城雩都縣諸水來會西流有歙河合滅江水自興國縣來會又南有桃江自信豐縣合龍南縣定南廳諸水來會經一州府東北與章水會曰贛江 又云一江自

一州府城東北經萬安縣東南有皂江自一縣來會又西北有遂江自龍泉縣來會經太和縣西南有牛吼江自永寧縣來會又東北有雲亭江自具國縣來會至吉安府廬陵縣東南有廬水自安福縣合永興永新諸水來會經吉水縣西南有恩江自永豐縣來會經峽江縣東南新淦縣西南有象江泥江自永豐縣來會至臨江府清江縣東南有秀江卽袁江自新喻縣合萍鄉宜春分宜縣諸水來會經豐城縣西又北分爲二支一東北有盱江支津自建昌撫州二府境來會一西北流會瑞州府之錦江水至南昌府西南合流又北支渠無數連絡交錯入于鄱陽湖水道提綱章水源出湖南郴州桂陽縣東之孤山三源合而

東流爲章水東入江西南安府界東北流至崇義縣西北又東經縣城北折東南經上猶縣西南又東經縣南又東北經南康縣北又東南至一州府治一縣西南之潭口東有池江合南安府諸水來會又東南折而北經府城西北貢江自城東來會 又云貢水卽古湖漢水源出福建汀州府長汀縣西北山兩源合而西流曰萬安溪又西入江西瑞金縣東界至縣南稍西有數水來注之水勢始盛又西南經會昌縣東北又西經縣西北又西北至雩都縣東南又西南有梅川水合諸水來會水勢益盛經縣城南而西而南凡合數水又西至崆峒山東麓折北流經府城東而北與章江會曰一江 又云章貢合而爲一江自府城

東北流折西北又北至萬安縣東南又西北至縣城南又
北經城西而北折東北至泰和縣西南又東北經縣城東
南又折而西北至吉安府治廬陵縣東南又北經府城東
又東北至吉水縣城西南又北經縣城西而北又東北經
峽江縣城東南又東至新淦縣西南又北經縣城西北折
東北至臨江府治清江縣東南合袁江盱江錦江東北流
至南昌府城西南江流甚盛支渠無數連絡交錯畢入鄱
陽湖 按元和志以自東來者爲章水自西來者爲貢水
寰宇記始以東爲貢水西爲章水至今仍之二水會于
州府城北而爲一水卽豫章水也水經注以豫章湖漢二
水總爲一水極是

新淦

本書淮南王傳前時南海王反先臣使將軍簡忌將兵擊
之以其軍降處之上淦應劭曰一一淦水所出西入湖漢
淦水上流曰上淦也 說文淦水入船中也一曰泥也
水經贛水又東北過一一縣西注云牽水又東逕一一縣
而注于豫章水湖漢及贛並通稱也又淦水出其縣下注
于贛水 師古曰淦音泔又音古含反 通典淦沽濫反
元和志今吉州一一縣本漢舊縣縣有淦水因以爲名
寰宇記縣南有紫淦水因以爲名廢城在今縣一百二
十里 集韻去聲五十三勘部瀨水名在豫章通作淦又
云淦水入船中也或作泔 輿地紀勝紫淦山在臨江軍

城東四十里淦水經其下相映作金紫色縣以是得名
 通雅淦音甘去聲又姑南切——屬臨江府南越地名漢
 書嚴助傳處之七淦是也 方輿紀要——故城在今臨
 江府六十里淦水在府南三十里——縣以此得名 大
 清一統志——故城在今臨江府清江縣東北府志云在
 清江鎮即今樟樹鎮也淦水源出縣東南離嶺經紫淦山
 出洋湖至清江鎮會蛇溪水入贛江漢——縣以此名也

都尉治

寰宇通志漢豫章都尉城在今臨江府治東三十里 名
 勝志臨江府清江縣有清江鎮鎮北有漢都尉城 清江
 縣志漢豫章都尉城在今縣東北三十里即清江鎮也

莽曰偶亭

南城

元和志今撫州——南豐臨川三縣並漢——縣地 寰
 宇記——縣東臨盱水漢高帝六年命灌嬰立豫章郡其
 年分豫章南境立——縣以其在郡城之南也 方輿紀
 要今建昌府附郭——縣本漢縣以在豫章郡城之南而
 名 大清一統志——故城在今建昌府——東東南
 水西北至南昌

屬本郡

入湖漢

師古曰盱音香于反 水經注盱水出——縣西北流逕

南昌縣南西注贛水 寰宇記盱水在今一一縣東二百一十步源出南當山西北沿流至臨川縣石門改名汝水 寰宇通志盱水在建昌府廣昌縣南一百二十里南當山之上血木嶺之下 今水經盱江源出建昌府廣昌縣血本嶺流六十里爲盱水又二十里爲巴溪又八十里至廣昌縣前又三十里入南豐縣境東北流百餘里至建城府城東南冰壺水東來入之又東北流二百餘里入撫州府境爲汝水流經金谿縣南曲折行百餘里至撫州城東抱城西北西寧水注之入南昌界過豐城縣東北流至南昌府城東南三十五里又東北入于彭蠡湖 方輿紀要盱月初出也江清且潔故名盱江在今建昌府城東一名

建昌江源出廣昌縣南血木嶺流六十里爲盱水又三十里爲巴溪又十五里爲山勳溪又七十里至廣昌縣前二十里入南豐縣界東北流百餘里至府城東南會新城縣飛猿諸水又東北折而西二百餘里入撫州境至臨川縣石門亦名汝水下流注於贛水 大清一統志盱江一名建昌江源出建昌府廣昌縣南血木嶺東北流繞廣昌南豐二縣南又東北過一一縣東轉西北入撫州府臨江縣又過南昌府南昌縣東又北入新建縣界入鄱陽湖 又云汝水在今撫州府臨川縣東卽古盱水也自建昌府南城縣北流入府境經金谿縣西石門山一名石門水又北入臨川縣界爲汝水合宜黃崇仁二縣水西北入南昌府

界 又云武陽水在今南昌府南昌縣東自撫州府臨江縣流入又之入新建縣界入東都湖亦名撫湖卽古盱水也縣志云武陽在縣東三十五里源出盱江自臨川北流經此號武陽渡一名辟邪渡又北入宮亭湖 皇朝通志盱江卽古盱水亦曰臨川江源出廣昌縣有三支合流經南又經南豐縣西南北流經建昌府南城縣東南有新城縣之黎水來會西流有金谿縣水來會又北經撫州府城東有臨水自崇仁縣東北合宜黃縣水來會又西北分支一西流經豐城縣東至南昌府城西南一北流經進賢縣西南新建縣東北又分二派與西流一派並入鄱陽湖水道提綱盱江卽古盱水亦曰臨川江亦曰汝水亦曰

東江源出廣昌縣南界血木嶺東北流經縣城南又東北至南豐縣西南繞東南又北至建昌府治南城縣南又北經府城東自此而北曰東江折西北又北曰汝水又北經撫州府城東又西北歧爲二派一西流一北流北流者又歧爲二派一北流一東北流皆北入鄱陽湖

建成

續志作建城 王子侯表——侯拾武帝元朔四年以長沙定王子封 雷次宗豫章記高帝六年置——縣隸豫章以 翔建城邑故曰—— 通典今筠州高安縣本漢——縣 寰宇記今筠州州城卽漢之——縣 大清一統志——故城卽今瑞安府高安縣治

蜀水東至南昌

屬本郡

入湖漢

水經注濁水出康樂縣又東逕望蔡縣又東逕一一縣又南至南昌縣東流入于贛水 寰宇記蜀水在今筠州高安縣北三里源出縣內小界山東流五百九十里入南昌縣與章水合 輿地紀勝蜀水出高安縣入豫章江 今水經蜀江一名筠江源出筠州府萬載縣龍河渡流至上高凌江合新昌滕江歷瑞州府城南而東匯于南昌之象潭入于章江 方輿紀要蜀江在今瑞州府治北源出袁州府萬載縣境龍河渡流至上高縣凌江口合新昌縣鹽

溪歷郡城中而東出匯于南昌之象潭而入章江亦曰錦江 大清一統志蜀水在今南昌府新建縣西南一名筠河又名瑞河又名錦江又名龍江自瑞州府高安縣流入合于章江縣志云水在縣西南六十里至縣境象牙潭入章江 又云蜀江在瑞州府治北一名蜀水亦曰錦江源出袁州府萬載縣界東流至上高縣凌江口合新昌縣鹽溪又東經縣南入高安縣界歷郡城中而東出又東至新建縣界入章江 又云龍江在袁州府萬載縣北五里即古蜀水也亦作濁水 皇朝通志瑞州府錦江即蜀水也名筠河又名瑞河源出萬載縣西北東流經上高縣西北有滕江自新昌縣合臨江諸水來會經高安縣西有鳳嶺

水龍口水來會至南昌府新建縣西南會贛水入鄱陽湖
水道提綱瑞州錦江卽古蜀水源出萬載縣西北與湖
南界之大圍山雲峰洞東南流又東流曰龍江經縣城北
又東折東北曰楊木江又東經上高縣西北又東南經縣
城西南折東北又北曰蜀江折東流至府治高安縣西又
東至府西南又東曰錦江又東北至南昌府治新建縣西
南會章江而東北經南昌府城西又東北入鄱陽湖蜀水
卽筠水爲豫章十川之一源流行六百餘里

莽曰多聚

宜春

晉書地道記縣出美酒隨歲舉上貢刺史親付計吏 元

和志今袁州郭下——縣本漢舊縣其城灌嬰所築又新

喻萍鄉二縣並——地 新唐書地理志——泉釀酒入

貢 寰宇記縣側有暖泉從地湧出夏冷冬暖清澄若鏡

瑩媚如春飲之宜人故以名縣在治西四里卽——水也

方輿勝覽——水宜釀酒王烈記云——醇酎隨歲入

貢 大清一統志——故城卽今袁州府——縣治 按

王子侯表——侯成武帝元光六年以長沙定王子封據

本志文南豫章並有——縣則長沙王子封邑當在豫章

水經注亦以豫章之——爲劉成國

南水東至新淦

屬本郡

入湖漢

水經注牽水西出——縣又東逕吳平縣又東逕新淦縣而注于豫章水亦名秀水 隋書地理志——有渝水 九域志——縣有袁江 輿地紀勝渝水發源自袁州入新喻縣名袁江卽漢志宜春縣之南水也 方輿紀要秀江在袁州府城北亦曰袁江亦曰喻水源出萍鄉縣羅霄山東流經府西十五里爲稠江至城下爲秀江下流三百里經分宜新喻至臨江府合大江 大清一統志袁江源出袁州府萍鄉縣羅霄山東北流入——縣北又東逕分宜縣南又東入臨江府新喻縣界又東至清江縣合章江古名南水亦名牽水又名渝水又名秀江 水道提綱袁江曰秀江卽古南水爲豫章十川之一源自萍鄉縣東南之羅霄山羅霄水出焉分流爲二派其西北流者入湖南醴縣界入洞庭湖其北流者卽秀水也西北流又折東北經縣東境又東北至袁州府城西北折東南經分宜縣城西南又東南至新喻縣界曰喻河東經縣城南又東折東北至清江縣東北入贛江源流行六百餘里

莽曰修曉

海昏

水經注繚水導源建昌縣東逕新吳縣又逕——縣謂之上繚水又謂之——江東北逕昌邑城而東出豫章大江謂之慨口昔漢昌邑王之封——也每乘流東望輒憤慨

而還世因名焉 續志劉昭注補——縣有昌邑城 師
古曰——卽昌邑王賀所封 通典今洪州建昌縣漢曰
——昌邑王廢後遷于此故城現在 元和志今洪州新
吳建昌武寧分寧四縣並漢——縣地故城在建昌東三
里 明統志昌邑城在建昌縣北六十里漢廢昌邑王爲
——侯卽其處 大清一統志——故城卽今南康府建
昌縣治縣志云在蘆潭東北二里許 按繚水卽脩水也
莽曰宜生

雩都

師古曰雩音于 晉書音義雩況于反 元和志今虔州
——縣漢初所置因——水爲名又安遠縣亦——地

寰宇記——本南海揭陽縣地漢高六年使灌嬰防趙佗
所立在郡城東四里地名東溪雩山在縣北三十里雩水
源出于此 方輿紀要雲山在——縣北三十五里高聳
干霄蓋古望祭之山也雩水出其下縣因以名其水西南
流入贛水 大清一統志——故城在今贛州府——縣
東北又縣東南亦有——故城乃唐初所遷也 水道提
綱雩水出——縣北雩山西南流經城東注於梅江又南
會貢江

湖漢水東至彭蠡

澤名在彭澤屬本郡

入江行九百八十里

水經注湖漢水出——縣導源西北流經金雞石又西北
逕贛縣東西入豫章水 大清一統志漢時豫章之水湖
漢為大故地理志于此水下獨曰東北入江其彭廬盱蜀
諸水皆云入湖漢豫章水雖亦云北入大江然不言諸水
入此亦不詳其里數疑當時尙未知二水之源與流同姑
並著之而專以湖漢為經流也自水經注以豫章水為正
源而湖漢之名遂隱

鄮陽

史記黔布傳番陽人殺布茲鄉民田舍師古曰——縣之
鄉也 鄮陽記——縣漢高帝六年置 水經注贛水又
北逕——縣餘水注之鄮音口堯反 玉篇鄮苦么切豫

章郡有——縣 寰宇記廢——縣在今鄮陽縣西北一

百二十里 大清一統志——故城在今饒州府鄮陽縣

西北

莽曰豫章

南壁

史記南越傳尉佗移檄告橫浦關索隱曰按南康記云南
野縣大庾嶺三十里至橫浦有秦時關其下謂之寨上

又云樓船將軍楊僕出豫章下橫浦 淮南人間訓始皇

使尉屠睢將五軍一軍守——之嶠 元和志今虔州南

康縣本漢灌嬰所置——縣也又信豐大庾二縣亦——

縣地 九域志南安軍南康縣有——鎮 地理通釋大

庾嶺在南安軍大庾縣西南二十里一名塞上嶺卽五嶺之一漢時呂嘉反漢軍伐之監軍庾信者築城于此故謂之大庾嶺 方輿紀要今南安府附郭大庾縣卽漢縣地相傳武帝時遣將軍庾勝討南越築城于此因有大庾之名 又云大庾嶺在江西南安府南二十五里廣東南雄府北六十里磅磚高聳爲五嶺之一水經注云連溪山卽大庾嶺也秦始皇三十三年以謫徒五十萬戍五嶺大庾其第一寨之嶺也其山延袤二百里上有橫浦關趙佗欲據越移檄告橫浦關武帝時楊僕出豫章下橫浦蓋踰嶺而南也曰橫浦者以郡城臨章江自西流東橫繞南峰而名 又云梅關在大庾嶺上兩崖壁立道出其中最爲高險卽秦時橫浦關也南康記云大庾嶺橫浦有秦時關唐宋以來謂之梅關 大清一統志故城在今南安府南康縣西南章岸 一水在縣西北一名桃水入章江 又云橫浦關在今廣東南雄府保昌縣西北大庾嶺在保昌縣北其曰梅嶺祇以多梅之故或謂以梅銷得名殆未足據

彭水東入湖漢

寰宇記益漿水古曰彭水在南康縣西五百九十里東流合西符水至 一口合涼熱水 明統志益漿水源出湖廣桂陽縣東四十里益漿鎮會北勝水橫水禮信水料水稍水流逕上猶縣前下入 一水 今水經猶水源出湖

安平

廣郴州桂陽縣東北一十七里孤山其水屈曲北流一百
 五十里入江西南安府界流經上猶縣治南為猶水東流
 至南康縣界入于章 大清一統志上猶江舊名益漿水
 即古之彭水也源出湖南郴州桂陽縣東四十里益漿鎮
 東流入江西南安府經崇義縣北又東經上猶縣南合猶
 水為上猶江亦名縣前水又東至南康縣東北界會章江

續郡國志平都故—— 元和志今吉州安福縣本漢——
 縣 寰宇記——故城在今安福縣南一百步 方輿
 紀要——故城在今安福縣東南六十里 大清一統志
 ——故城在今吉安府安福縣東南

侯國

王子侯表——侯謂元帝初元元年以長沙孝王子封
 莽曰安寧

漢書地理志補注卷四十一

桂陽郡

常熟 吳卓信 編纂

應劭曰桂水所出東北入湘 水經注來水東肥水南有

——故城 後書桓帝紀注——在桂水之陽今連

州縣張浮休南遷錄古——在湘之東南五六百里其

地皆山谷實嶺之北麓也 方輿紀要——今湖廣郴

州及桂陽州又廣東連州皆是其地 按漢——今湖

南郴州之永興縣桂陽州之臨武藍山二縣衡州府之耒

陽縣又廣東韶州府之曲江英德二縣連州之陽山縣皆

其地

高帝置

水經注——漢高帝二年分長沙置 寰宇通志漢分

秦長沙南境立——以在桂水之陽也 方輿紀要——

——秦長沙郡地漢初屬長沙國文帝後七年為郡 地

理志稽疑桂陽故屬秦長沙郡義帝所都高帝二年分置

五年屬長沙國景帝後以邊郡收時南粵閩粵未平故桂

陽廬江豫章會稽皆為邊史記所謂南邊也

莽曰南平屬荊州有鐵官

宋祁曰邵本作金官 續郡國志耒陽縣有鐵 寰宇通

志今辰州府瀘溪辰溪溆浦三縣出鐵 大清一統志今

郴州及宜章永興桂陽縣出鐵

縣十一

郴臨武使南平耒陽桂陽陽山曲江含洄澧陽陰山

郴

如淳曰音緜 師古曰——緜二字並音丑林反 水經注

黃水出——縣西黃岑山東北流注于耒水謂之——口——桂

陽郡治也 括地志黃岑山在——州城南——水所出 元

和志今——州郭下——縣本漢舊縣又義章義昌平陽資興

四縣並漢——縣地 說文繫傳衡陽——縣在——水之側

輿地紀勝——侯山在——縣漢昭帝四年封楚王孫暢為——

侯因名 方輿勝覽漢——縣即今桂陽軍平陽縣黃岑山

在今——州——縣南三十六里即五嶺之一或云即騎田嶺

一水過郡城一里始勝舟又北行四十五里至鯉園步江口合東江始爲大一江入耒水方有水程今水經一江源發一州城南三十六里黃岑山北流經一州城東爲一江下流耒水入之經永興縣至一口棲鳳水入之經衡州府耒陽縣界歷府城北至耒口入于湘大清一統志一縣故城卽今一州治一江在州東發源黃岑山北流經一江口會東江合程江水由便江至一口入耒水一名黃水一名一水水道提綱一江出一州南境之黃岑山北流經州城東南又北經城東又東北與耒水會以下總曰一江

耒山耒水所出西至湘南

耒山耒水所出西至湘南

耒山耒水所出西至湘南

屬長沙國入湖師古曰耒音卽內反水經耒水出桂陽一縣南山又北過其縣之西又北過便縣之西又西北過耒陽縣之東又北過鄱縣東北入于湘注云耒水發源出汝城縣東烏龍白騎山西北流逕其縣北又北逕其縣西無出南山之理亦不得北過其縣西也水經注耒水西北至靈臨承縣而右注湘水謂之耒口輿地紀勝耒山在今一州桂陽縣南十里四面孤絕方輿勝覽耒水在耒陽縣一名歷水中有大厯方容百斛今水經耒水出桂陽縣南五里耒山西流資興水入之又西流八十里水勢險惡北入郴

水 方輿紀要耒山在今一州桂陽縣南五里四面孤絕
耒水出于此西北流合資興水又西北會一水下流注于
湘 大清一統志耒江源出一州桂陽縣南耒山西北流
入興寧縣界又西北入本州界又北入永興縣界又北入
衡州府耒陽縣東南又北至衡陽縣東北耒河口又西北
入湘一名日華水 水道提綱耒水卽一江也一水與耒
水合總名耒水出桂陽縣南山有二源皆在山北一東流
一西流合而西北流經縣城西又西北折東北又西北經
興寧縣南又西北至一州東北之一江口一江自南來會
又北折而東北至永興縣東南又西北經永興縣城西又
北至耒陽縣之西南折而東北又折西北經衡陽縣東南

又西北與湘江會此水源流曲折七百餘里

項羽所立義帝都此

史記項羽本紀項王使人徙義帝曰古之帝者地方千里
必居上游乃使使徙義帝長沙一縣趣義帝行陰令衡山
臨江王擊殺之江中 水經注一縣城項羽遷義帝所築
縣南有義帝冢內有石虎土人因呼爲白虎郡 方輿勝
覽義帝陵在今一州城內明倫坊

莽曰宣風

臨武

後書和帝紀一一縣接南海 水經注武谿水出一縣
西北桐柏山東南流右會溱水亂流東南逕一一縣西謂

之武谿縣側臨武谿東因曰——元和志今郴州——
縣本漢舊縣南臨武谿水因以為名 九域志武谿水經
——縣治南縣因以名俗稱姥婆城 方輿勝覽漢——
縣今屬桂陽軍 方輿紀要——城在今桂陽州——縣
東五十里武水源出縣之西山流經郴州宜章縣南而入
韶州府東昌縣境又東南流至武府城東南而合于瀘水
大清一統志——故城在今桂陽州——縣東武谿水
古名虎谿又名瀧水唐改為武谿又名武陽溪自——縣
西經郴州宜章縣入乳源縣西北又東經東昌縣西又東
南入曲江縣界合東江 按史記樊噲傳漢王賜爵為列
侯號——侯正義曰即桂陽——縣考戰國秦時之際趙

亦有——君未必遠取桂陽之——也
漆水

舊作秦水誤

東南至瀘陽

屬本郡

入滙

舊作入滙誤

行七百里

海內東經肄水出——西南而注于海郭注肄如肄習之
肄漆水之別名也 說文漆水出桂陽——縣入滙从水
秦聲臣錯曰今人以此字為澮消之澮 水經漆水出桂

陽——縣南繞城西北屈東流東至曲江縣安聶邑東屈西南流過澧陽縣出漚浦關與桂水合南入于海注云溱水導源——縣西南北流逕縣西而北與武谿合武谿水南入重山 曲江縣界謂之瀧中瀧水南逕曲江縣東號北瀧水水左即東谿口亦名東江又名始此水東江又西注于北江謂之東江口溱水自此有始興大江之名南逕澧陽縣西又西南歷澧陽峽出峽則澧水注之又西南匯水入焉又西南至中宿縣 大清一統志溱水一名肄水即今始興大江也源出桂陽州——縣華陰山東流經郴州宜章縣流入乳源縣西北又經英德縣東又西南入廣州府清遠縣界按水經以溱水為經流尋源既遠又合武

溪東江諸水故謂之始興大江以別于東江後人混溱于澧即以始興水為澧水乃并東而混之且謂澧武二水抱城回曲因名曲江無論道元以曲為山岡之名非江流回曲之謂即以水道考之溱水自北而南合武水先逕曲江縣東然後南逕澧陽縣西又西南匯澧陽峽而後澧水注之安得曲江縣遂有澧武抱城之說元和志于澧陽縣云溱水一名始興大江北自韶州曲江縣界流入是溱由曲江而及澧陽與澧水為二與水經合乃于曲江縣又云澧水在縣東一里漢征南越下澧水即此則語屬牽合始以溱水本在縣東而訛也又寰宇記云澧水源從虔州信豐縣分流西合大庾嶺銀岡水入澧陽縣界至韶州合始興

樂昌水入海通志則以出信豐者為昌水又謂瀘水源出
 庾嶺殆皆因水經注東溪遠溪源出南溪康既混始興大
 江于東江遂混東江為瀘水而發源亦混矣明統志謂曲
 江至英德縣又名始興江通志又謂溱水源出清遠縣之
 溱源山按英德本瀘陽縣地而清遠即漢之中宿縣又在
 英德下流紛紜繆戾愈辨愈舛矣 漢書考異秦水即說
 文之溱水也滙蓋滙字之訛師古讀為胡賄反失之遠矣
 按溱水說文以出桂陽臨武者當之而水經注汝水篇
 亦有出平興之洧水若其出鄭地所謂溱洧之水者說文
 作澮其音如溱其字不作溱也水經及酈注亦並作澮不
 知何時蓋毛詩外傳國語孟子史漢諸書凡言洧溱之水

者皆改為溱形聲俱變實不可解不有水經注人又以說
 文為異字矣

莽曰大武

便

索隱音鞭 水經耒水又北過一縣之西 元和志今郴
 州高亭縣本漢一縣 大清一統志一縣故城即今郴州
 永興縣治 按功臣侯表一頃侯吳口孝惠元年以長沙
 定王子封據表注以為江夏之偏縣 索隱曰縣屬桂陽
 則當从水經注為是

莽曰便屏

南平

說文出桂陽——西入營道 水經鍾水出桂陽南平縣
都山注云都山卽部龍之嶠五嶺之第三嶺也鍾水卽嶠
水 元和志今郴州藍水縣本漢——縣 輿地紀勝——
——故城在今桂陽軍藍山縣東五里 大清一統志——
故城在今桂陽州藍山縣東縣志云今縣東——鄉是
耒陽

說文耒今桂陽邾縣从邑來聲臣錯曰按字書縣有耒水
下入邾也 水經耒水又西北過——縣之東注云——
舊縣也蓋因水以制名東傍耒水水東肥南有郡故城
師古曰縣在耒水之陽也 隋志衡山郡涑陰縣舊曰——
——平陳後改 元和志今衡州——縣本秦舊縣因耒水

在縣東爲名又常寧縣亦——地 寰宇通志——縣故
城在今衡州府——縣驚山口 大清一統志——故城
在今衡州府——縣東北四十五里
春山春水所出北至邾

屬長沙國

入湖

水經注春水上承春陵縣西北潭山又北逕新寧縣東又
西北流注于湘水 方輿勝覽春陵山在寧遠縣東北七
十五里五山相接山勢秀拔春陵水出焉 明統志春水
源出春陵山東南流經桂陽州藍山縣界下流入湘 今
水經春水源出道州寧遠縣東北七十五里春陵山東流

逕桂陽州藍山縣界又東流至桂陽州北三十里歸水入之又北至常寧縣界入于湘 大清一統志春陵山在今永州府寧遠縣東北接新田縣界春水在今永州府新田縣南東流入桂陽州名衡塘水合藍山縣歸水循州境西下十八灘合桂水至衡州府常寧縣爲焦源河經逍遙山東又自縣東北折而西經盟山及風仙山北入相 水道提綱春陵水源出新田縣西北與寧遠界之春陵山俗曰烏江源也東南流經縣城西南又東南至石口與歸水會歸水卽舜水源出九疑山東北流經嘉禾縣城南又東北至石口東與春陵水合入于湘

過郡二

過桂陽長沙二郡

行七百八十里莽曰南平亭

桂陽

本書武帝紀元鼎四年封南越伏波將軍路博德屯——

待使者 應劭曰——桂水所出東北入湘 裴氏廣州

記五嶺一名—— 水經注桂水出——縣北界山北逕

東南平縣而東北流屈鍾亭右會鍾水通爲桂水也 通

典今連州所理——縣漢舊縣以其在桂水之陽爲名

元和志今連州——連山二縣並漢——縣地 輿地廣

記連州——縣漢屬——郡所謂小桂也 方輿勝覽桂

水在——縣西南 方輿紀要——山在連州西北二十

八里縣名——以此其山與九疑對峙凡數百里 大清一統志——故城即今廣東連州洺桂水在郴州西四十里源出——州藍山縣南東北流逕嘉禾縣又東北入州界合春水入湘

漚水

舊作漚水誤

南至四會

屬南海郡

入鬱

舊作入鬱林誤 史記南越傳尉佗移檄告湼谿關索隱曰鄒氏劉氏本湼並作湼漢書作湼而姚察云史記作漚

今本有湼湼及漚不同蓋出隨見輒改故也 本書武帝

紀元鼎五年秋遣伏波將軍路博德出——下湼水 說

文漚水出——縣盧聚山漚浦關為桂水从水匡聲 海

內東經湼水出——西北山東南注肄水 徐廣史記音

義湼水一名漚水出——通四會亦曰灌水又曰桂水皆

別名也 水經漚水出——縣盧聚東南過含漚縣南出

漚浦關為桂水注云漚水出——縣西北上驛山盧溪為

盧溪水東南流逕——縣故城漚水又東南逕陽山縣東

南又經含漚縣左合翁水又東南在合陶水又經含漚縣

西又南出漚浦關為桂水右合溱水謂之漚口 方輿記

要湼水出湖廣寧遠縣九疑山流入廣州府界經連州陽

山縣東西南流經州城東又折而東南入韶州府英德縣界又南流入廣州府清遠縣境至縣東南與湏水合亦曰滄水亦曰滙水亦曰洸水其合湏水之處亦曰滙口亦曰洸口漢時路博德別兵下湟水卽此 大清一統志滙水一名湟水一名洸水一名桂水又名盧水源出連州西北東南流經陽山縣南又東南流入韶州府英德縣界經縣西北四十二里又西南流入湊水 水道提綱滙水古所謂湟水也源出連山縣西南境東流經縣城南又東北至連州西南又東經州城南又東南至連山縣北境又南經縣城西南又東南至英德縣南而東與湏江合源流五百餘里 漢書考異滙字是滙字之誤水經注可證鬱下不當有林字鬱林郡廣鬱縣下首受夜郎豚水東至四會入海此滙水亦至四會入鬱也 按宋祁云景林無林字是舊時本無林字也

過郡二

過桂陽南海二郡

行九百里

陽山

史記南越傳尉佗移檄告一一關絕道自守索隱曰姚氏云桂陽有一一縣今此縣上流百餘里有騎田嶺當是一一關 應劭曰今陰山也宋書州郡志一一本漢舊縣後漢曰陰山吳始興郡無此縣當是晉後立 水經注滙水

南逕——縣故城西又逕——縣南縣故含涇縣之桃鄉也 又云涿水又西北過陰山縣南本——縣也縣東北猶有——故城卽長沙孝王子宗之邑也 師古曰下自有陰山應說非也 通典今衡州湘潭縣漢——縣有南嶽衡山 元和志今連州——縣本漢舊縣爲南越置關之邑故其關在縣西北四十里茂溪口漢破南越遂以爲縣韓愈送區册序——天下之窮處也 九域志日出先照故名—— 方輿紀要——故城在今連州——縣南新唐書志——縣有秦湟谿關郡國志——縣理涇水之南卽其故墟 又云——關在——縣北當騎田嶺路秦始皇二十六年既定南越遂于此置關姚氏曰縣去騎田嶺不過百餘里嶺卽郴州之黃岑山也 大清一統志——故城在今連州——縣東關在縣西北湟水上縣志云——鎮在縣南二里卽漢故縣 漢書顏注拾遺桂陽郡——陰山皆云侯國而後漢省并——入陰山故應氏云然師古規之過矣 新校地理志縣在九疑山之陽故得稱

侯國

王子侯表——節侯宋元帝初元元年以長沙孝王子封

曲江

盛宏之荊州記始興郡有東州江發源南康大庾嶠下南流西轉與北江合 水經注縣昔號曲紅曲紅山名也東

連岡是矣 又云——縣東傍瀧谿谿水在左卽東谿口也水出江州南康縣界右閩山西流而與連水合連水南流注于東谿東谿亦名東江又名始興水又西逕始興縣南又西入——縣又西與利水合利水南注東江東江又西注于北江謂之東江口 元和志今韶州郭下——縣本漢舊縣江流回曲因以爲名又東昌仁化二縣亦——地 輿地紀勝瀆水武水合而曲抱州城故曰曲江 方與紀要瀆水南至韶州府東南武水流合焉二水相合謂之相江其水抱城回曲故曰曲江又流經城東亦曰東江也 大清一統志——故城在今韶州府——縣西 又云東江一名始興水一名湘江以晉置湘州故也在今——

——縣東縣之所以名江及溱水有始興大江之名者本以江東八縣合流之故江源出今南安府之南康縣而與大庾嶺之漣水合流自寰宇記以瀆水出虔州之信豐東合大庾嶺銀岡水流至韶州于是東江之迹晦而瀆水并奪溱水之名矣 曾鞏曰熙寧八年予從知韶州王之林求得漢桂陽太守周府君碑其碑陰——字皆作曲紅而蒼江江夏字亦作紅蓋古字通用 洪适隸釋周府君碑陰宰曲紅者一人貫紅曲者十六人漢綏民校尉熊君碑亦同而兩漢書皆作——諸家地理書皆云水流屈曲故曰——惟水經注云縣昔號曲紅山之名也女工大功皆同用紅字未知酈氏何所據也 趙明誠金石錄周府君碑

陰題名凡三十一人姓氏具存自縣長區社而下凡十七人皆書爲曲紅則是當時縣名曲紅無可疑者不知兩漢書皆作——何也 葉奕苞經鋤堂雜誌洪氏跋周碑曝陰以兩漢書有曲江無曲紅水經注以曲紅爲山名不知何據按漢綏民校尉熊君碑亦云桂陽曲紅灌陽長則鄺氏之說似爲可信 水經注釋寰宇記梓州射洪縣下引李膺記云婁僂灘東有射江土人語誤以江爲洪則知——之爲曲紅亦是音同之故

莽曰除虜

含涯

師古曰涯音匡

通典元和志並作滄涯

應劭曰涯水

所出東北入沅 水經涯水自陽山縣東南過——縣注云應劭謂涯水東北入沅臣瓚注漢書謂沅在武陵去涯遠又隔水不得入沅也 後書衛颯傳注——故城在今廣州——縣東 元和志今廣州浚涯縣本漢舊縣以縣界涯水爲名其漢時故城在今縣東四里 方輿紀要——廢縣在今英德縣西七十五里 大清一統志——故城在今韶州府英德縣西 按涯水卽桂陽縣下誤作滙水者也集韻涯本作口隸省作涯亦有作涯者蓋因避太祖諱缺筆作涯而誤作涯耳

瀕陽

鄭德讀瀕爲檉

孟康讀爲貞

蘇林音檉柱之檉

師

古曰音文庚反又音澆 本書武帝紀元鼎五年遣樓船將軍楊僕出豫章下澆水 說文澆水出南海龍川西入溱从水貞聲 水經注溱水南逕——縣西縣東有澆石山廣圓三十里溱水又西南厯——峽左則澆水注之水出南海龍川縣西逕——縣南又注溱水 元和志今廣州——縣本漢舊縣在澆水之陽因名澆山在縣北四十里澆水所出又韶州翁源縣亦——之地 方輿勝覽澆山在今英德府澆陽縣北四十里尉佗爲地於此眞陽峽在眞陽縣東南十五里崖壁千仞 今水經澆水亦名北江源出大庾嶺流經南雄府城南又名保水始興縣在其東北杜安水西流來合之又西南流凌江水來合之又西

合朔水逕韶州府仁化縣治南會澆水入之又逕韶州府城東黎谿入之又南流合武水爲曲江下流至英德縣西一十五里兩山對峙夾水號澆陽峽又合翁溪逕廣州府湟水合焉至南海縣西入于西江 方輿紀要——廢縣卽今韶州府英德縣治澆水出南雄府北大庾嶺東南流經府城南又西經始興縣西而入韶州府界經府城東武水流注之亦曰曲江亦曰相江亦曰始興江又南流經英德縣西出澆陽峽入廣州府清遠縣界經縣東又南流會湟水又南流經三水縣西至府西北三十餘里逶迤而會于西江漢伐南越樓船將軍楊仆出豫章下澆水是也 大清一統志——故城在今韶州府英德縣東澆水發

源惠州府龍川縣經連平州流經韶州府翁源縣南又東
流經英德縣東南入溱水自元和志有瀘水在曲江縣東
一里之說輿地紀勝有溱水亦名瀘水避仁宗嫌名改爲
眞水之說而瀘與溱始混寰宇記又有瀘水源從虔州信
豐縣分流西合大庾嶺銀岡水入——縣界至韶州之說
而瀘與東江又混考元和志所據漢書征南越出豫章下
瀘水語不知龍川本與豫章郡接界出虔州而至龍川則
下瀘水矣寰宇記所謂瀘水源出信豐者乃誤因水經注
文道源云東溪水出始興東江州南康縣界石閣山晉之
南康縣則唐宋之信豐縣也道元又云西流與連水合水
出南康縣涼熱山連谿山卽大庾嶺則寰宇記所謂西合

大庾銀岡水者也不知出信豐者乃是東谿亦名東江亦
曰始興水而與龍川之瀘水無與若韶州瀘水經衣之道
則斷從翁源縣始後人既知此爲古瀘水仍牽于元和寰
宇之說不得已加南字以別之誤矣 皇朝通志北江卽
瀘水出南雄府保昌縣北之梅嶺曰大庾河至府東北有
保水合昌水來會西南流經始興縣東北有始興溪合諸
水來會又西南有錦江自仁化縣來會經韶州府治曲江
縣東北有東昌縣水卽溱水自湖南宜章縣合諸水來會
又西南有漠溪自乳源縣來會宣溪自陽山縣來會經英
德縣東南有翁江自翁源縣來會又西南有涯水自陽山
縣合連山縣連州諸水來會經清遠縣西分爲二派一支

日綏江經三水縣分一支與西江支津會又東北至廣州府城西會西江正支東流有花縣水從化縣水來會又分二派東派會從化水于石門南爲巨浸分支津會東江正支於府城西南會西江及東江水又南入于海 水道提綱北江卽古滇水源出南雄府治保昌縣有三源北源出縣北曰大庾河東南流東北源曰保水出縣東北西南流東南流曰昌水出縣東西北流並合于府東北水勢頗盛俗曰滇江西南流至府城東北折而西經城南又西南經始興縣東北又西過縣北又西南經韶州府治曲江縣東北又西南經府城東南又南經英德縣北又南經縣城東南又西南合滙水卽湟水也水勢大盛南流入清遠縣北莽曰基武

水經注作基武

陰山

境又西南經縣城東南又西至縣南又西南分爲二派又合又分至廣州府城西南會西江東江又南入于海

水經湘水又東北過——縣西沘水從東南來注之 又云沘水又西北過——縣南注云縣本陽山縣也縣東北猶有陽山故城形家言其勢王墳塹山堙谷改曰——山沘水又西北逕其縣東又西北入于湘 元和志今衡州衡山縣本漢——縣以縣東一百二十里有陰山也 方輿紀要——城在今長沙府攸縣西北六十里 大清一統

志——廢縣在今連州陽山縣北 按水經注云——本
 陽山縣縣東北猶有陽山故城形家言其勢王故塹山埋
 谷改曰——今據本志桂陽郡有陽山縣又有——縣皆
 云侯國至續志有——無陽山故應仲遠謂陽山今——
 而顏氏以應說為非殆未之詳考耳宋志云——故舊縣
 屬桂陽吳湘東郡有此疑是吳所立沈約所云亦非孫吳
 所立是湘東郡而廢桂陽之——縣隸之故晉志湘東郡
 有——縣——縣未嘗廢省何容復立乎

侯國

漢書考異據水經注云陽山故長沙孝王子宗之邑以其
 勢王改曰——是——即陽山之改名矣志於陽山——
 兩縣下並云侯國則酈注似未可據侯表亦未見有封——
 者當闕以俟考

漢書地理志補注卷四十二

武陵郡高帝置

常熟

吳卓信

編纂

史記蘇秦傳說楚威王曰西有黔中巫郡正義曰今朗州
楚黔中郡漢更名武陵 後書南蠻傳秦昭王使白起伐
楚略取蠻夷始置黔中郡漢興改爲武陵 武陵先賢傳
潘京世長爲郡主簿太守趙偉甚器之問京貴郡何以名
武陵京答曰鄙郡本名義陵在辰陽縣界與夷相接數爲
所破光武時移治東山之上遂易號傳曰止戈爲武詩云
高平曰陵于是名焉 劉昭續志注補前書本名——不
知潘氏此對何所據而出 水經注秦昭襄王二十七年

使司馬錯以隴蜀軍攻楚楚割漢北與秦至三十年秦又取楚巫黔及江南地以爲黔中郡漢高祖五年割黔中故治爲——括地志秦黔中故城在今辰州沅陵縣西二十里元和志秦黔中郡所理在辰州西二十里漢改黔中爲——卽今辰州溆浦縣輿地紀勝——其地故郢之裔邑與夜郎諸夷錯吳師道補注國策黔中今黔辰施元等州方輿紀要——秦黔中郡地今常德府辰州府之境是其地按地理志稽疑黔中郡故楚置秦昭王三十年因之漢之——也前志闕按楚世家秦本紀六國年表皆載之不知何以班氏不及至續志始補入之考國策及史記其時楚尙有新城郡巫郡秦省新城

蓋并入漢中省巫蓋并入黔中水經注謂割黔中置——亦非也漢改其名非割也按漢——今湖南常德

府之武陵縣辰州府之沅陵辰溪溆浦三縣沅州府之黔陽縣永順府之永順保靖二縣澧州之慈利縣又湖北荊州府之公安縣宜昌府之長陽縣皆其地

莽曰建平屬荊州縣十三

索孱陵臨沅沅陵潭成無陽遷陵辰陽酉陽義陵佷山零陽充

索

如淳曰音繩索之索續郡國志漢壽故——陽嘉三年更名水經注漢壽縣治——城卽——縣之故城也順帝陽嘉

中改從今名 元和志朗州龍陽縣本漢一縣地 方輿紀要漢武陵郡治一縣後漢陽嘉三年更名漢壽故城在今常德府武陵縣東四十里名漢壽鄉 大清一統志一縣故城在今常德府武陵縣東北六十里

漸水東北沅

水經注澹水出漢壽縣西陽山南流東折逕其縣南闕駟以為興水所出東入沅而是水又東歷諸湖方南注沅亦是漸水也水所入之處謂之鼎口 方輿勝覽武陵縣有水名鼎口中多魚 大清一統志漸水在縣北源出梁山流入龍陽縣西北入沅水一名澹水一名鼎水亦謂之烏江 常德府志漸水源出梁山西麓靈泉寺側石罅中東北歷諸湖而出鼎港

孱陵

應劭曰孱音踐 師古曰音仕連反劉賢音仕顏反晉書音義音士限反 水經注江水又逕南平郡一一縣之孱鄉城北縣治故城劉備孫夫人更修之其城背油向澤江水又東右合油口又東逕公安縣北縣有油水 後書南蠻傳注一一故城在今荆州公安縣西南 通典今荆州公安縣岳州華容縣豐州安鄉縣並漢一一縣地 九域志江陵府公安邛有一一鎮 名勝志一一漢高帝五年置遺址在今荆州府公安縣西南二十五里 大清一統志一一故城在今荆州府公安縣南

莽曰孱陸

臨沅

師古曰沅音元 應劭曰沅水出牂柯入于江 水經注

沅水又東歷——縣西又東逕——縣南縣南臨沅水因

以為名 後書光武紀注——縣故城在今朗州武陵縣

方輿紀要——城在今常德府治東一名張若城地記

云秦昭王三十年使白起伐楚起定黔中留其將張若守

之若因築此城以拒楚城西又有司馬錯城與張若城相

距二里同時所築 大清一統志——故城在今常德府

武陵縣西沅水在縣南今謂之沅江自辰州府沅陵縣東

流入桃源縣界又東入武陵縣界又東入龍陽縣界又東

入沅江縣界入洞庭湖

莽曰監沅

沅陵

功臣侯表——頃侯吳陽高后元年以長沙定王子封

水經注沅水又東逕——縣西有武溪源水源石上有盤

瓠跡又東逕——縣北城北枕沅水又東逕——縣故城

北移縣治之舊城置都尉府因岡傍阿勢盡川陸臨沅對

酉二川之交會也 又云酉水又東注——縣北又東南

注沅水關駟謂之受水其水所決入名曰酉口 通典今

辰州瀘溪縣有武谿水縣西有武山武陵紀云高可萬仞

上有石窟有一石如狗形云是盤瓠漢——縣地也 元

和志今辰州郭下——縣本漢舊縣又盧溪縣亦——地
又云今溪州漢屬武陵郡為——遷陵二縣之地 方
輿紀要今辰州府郭——縣即漢縣 大清一統志——
故城在今辰州府——縣西南

莽曰沅陸

鐔成

應劭曰鐔音注 孟康音譚 郭璞音尋 師古曰孟音

是 淮南人間訓始皇使尉屠睢發卒五十萬為五軍一

軍塞——城之嶺高誘注——城在武陵西南接鬱林郡 水

經注無陽縣故——也晉義熙中改從今名 通典今敘

州朗溪縣本漢——縣地有沅溪水 方輿紀要——廢

縣在今沅州黔陽縣西 大清一統志——故城在今沅

州府黔陽縣西南

康谷水南入海

水經浪水出武林陵——縣北界沅水谷 按康谷水當

即水經之浪水

玉山潭水所出東至阿林

屬鬱林郡

入鬱

說文潭水出武陵——玉山東入鬱从水覃聲 水經注

潭水出武陵郡——縣玉山東流逕鬱林即潭中縣又逕

中雷縣東阿陵縣西右入鬱水 寰宇記潭江出黃水縣

西北當麗山 方輿紀要福祿江源出貴州黎平府古州長官司西南南流入廣西柳州府懷遠縣境遶縣西歷融縣東謂之融江亦名潭江又東南經柳城縣東至府城西而名柳江泝其源而言之亦曰黔江從其流而名之亦曰潯江也 大清一統志柳江上流卽貴州黎平府福祿江自永從縣界流入柳州府懷遠縣西北名古州江亦謂之大江卽古潭水也又南入融縣東爲融江又經柳城縣西與龍江會曰合浦環繞縣南名潭江亦名柳江又經府城南又東南經象州西名象江又南入思恩府賓州潯州府武宣縣界按通志柳江有二一來自古坭一來自慶遠經柳城縣合流至郡古坭山在懷遠縣北潯水所出下流入

融江此卽從貴州永從縣來一支水也柳城西南有龍江自慶遠府流來本古周水下流入潭江此卽從慶遠來一支水也 皇朝通志柳江出貴州永從縣西生苗水中入縣西界曰福祿江入廣西懷遠縣境東南流有水自永從縣西南境來會又東南分二派至懷遠縣北而合經融縣東北曰融江經羅城縣東北至柳城縣西北有龍江自慶遠府會貴州獨山州荔波縣水及南丹州河池州思恩宜山忻城天河諸縣水來會曰柳江至柳州府馬平縣西南有洛清江自雒容縣合永福縣諸水來會經象州北而南有都泥江卽兩盤江來會 水道提綱柳江出貴州永從縣西生苗山中東南流入縣西界曰福祿江又東南入廣

西界經懷遠縣西北融縣東北曰融江又經羅城縣東北
 柳城縣西北入柳江又經柳州府城象州城至天孟山西
 南紅水河自來賓縣來會俗曰都泥江也 殷氏說文注
 潭水即今福祿江源出苗地東南至今貴州黎平府西為
 古州江東至永從縣南合彩江為福祿江入廣西界至柳
 城縣為柳江又東南經象州至潯州府城北曰潯江此為
 廣西之右江亦曰北江合廣西左江亦曰南江即所謂入
 鬱也唐始置潯州以北潯江為名潯江即古潭水古二字
 同音因改其字耳今人上流為柳江下流為潯江漢人統
 曰潭下流亦曰溜潭與溜實一水也 按潭當作鐔縣所
 名也宋景文亦云

過郡二

過武陵鬱林二郡

行七百二十里

無陽無水首受故且蘭

屬牂柯郡

南入沅行八百九十里

水經注沅水東逕——縣縣對無水因以氏焉無水出故

且蘭南流至——故縣又東南入沅謂之無口 又云西

水東南流逕——故縣南 元和志今敘州龍標縣本漢

——縣地縣在無水之陽故名 輿地紀勝沅州盧陽縣

本漢無陽縣地澧水在其界巫無無舞澧一水而五名聲

之變耳 方輿紀要清江在今貴州思州府東卽舞水也
經鎮遠府境曰鎮洋江流至府西三十里曰在溪以泉水
所滄也又東經城南曰界溪至府東二十里曰平溪流入
湖廣沅州境注于沅江 又云鎮陽江在今貴州鎮遠府
治南一名鎮南江又名澗溪志以爲五溪之一也亦曰鎮
遠河受興隆黃平諸水過府城而東流三百餘里入于沅
江 大清一統志無水自貴州思州府玉屏縣東流二十
里至掛榜灘入沅州府界又東流一百七十里至郡城西
又經城南折而東南流至黔陽縣城西入沅水一曰口聚
亦曰灑水又曰舞水一作澗水武陵五溪之一也 又云
西門河在今貴州平越府黃平州西卽澗溪之源漢志所
謂無水也一名鎮南江又名鎮陽江流入鎮遠府城南又
東北入思州府城東名清江合府境諸水流入玉屏縣界
謂之平江又東入湖南沅州府境注于沅江 水道提綱
武溪卽澗溪有數源名稱不一其最遠者出貴州銅仁府
北界印江縣東南界烏羅司南山東南流又折而東北共
百餘里入湖南界經乾州衛西又東北有烏巢江自西南
來會水勢始盛又東南又東北又東經瀘溪城南東入沅江
遷陵

水經注延江水又東南入——縣 又云酉水又東逕——
故縣界與西鄉溪合卽延江之支津更始之下流也謂
之西鄉溪口又東逕——縣故城北 元和志今溪州三

亭縣本漢——縣 方輿紀要——城在今四川酉陽宣撫司東南接湖廣辰州府界 大清一統志——故城在今永順府保靖縣東

莽曰遷陸

辰陽

屈原九章朝發枉渚兮夕宿——王逸注——地名 水經注沅水又東逕——縣東南合辰水辰水逕縣北舊治在辰水之陽故取名焉 後書宋均傳注——今辰州辰溪縣 通典今辰州辰溪縣漢曰——縣即武溪之一元和志今辰州辰溪縣本漢——縣以在辰水之陽也故城在縣東 大清一統志——故城在今辰州府辰溪縣

西

三山谷辰水所出南入沅

水經注辰水出——縣三山谷東南流獨母水注之又逕其縣北右會沅水名之爲辰溪口武陵有五溪謂雄溪橐溪無溪酉溪辰溪其一焉爲夾溪悉是蠻獠所居故謂此蠻爲五溪蠻也 九域志麻陽縣有辰水 今水經辰水在辰州府東源出府城東二百四十里三崕山南流入沅方輿紀要辰水源出三崕山南流至辰溪縣界入沅江一名辰溪即禹貢九江之一也 大清一統志九龍山在銅仁府城西烏羅司西南六十里一名梵淨山俗名飯甑山又名月鏡山即古之三山谷辰水源出九龍山東流經

府城西南名銅仁江又東南入辰州府鳳凰營及麻陽縣界又東北流辰溪縣西南入沅武陵五溪之一也亦名辰溪一名錦水又名錦江以此水經古錦州故謂之錦水沅陵縣東亦有辰水南流入沅與此水名同實異 水道提綱麻陽河即古辰水有數源最遠者出貴州銅仁府西北界曰順溪南流合諸水經府城南又東入湖用麻陽縣界又東南經縣城南折而北經城東又東北至辰溪縣城西南入沅江

行七百五十里莽曰會亭

酉陽

水經注酉水東逕——故縣南縣故酉陵也 元和志今

黔川彭水黔江洪杜三縣本漢——縣地 又云今思州

在楚為黔中地秦拔之置郡自漢至吳並為武陵郡——

縣地 晏殊類要——故城在今沅陵縣西 名勝志——

——城在今沅陵縣城西即黔中郡故城基也 方輿紀要

——城在今湖廣辰州府沅陵縣西北一百二十里——

山在四川——宣撫司西北一百八十里接重慶府黔江

縣界 大清一統志——故城在今永順府永順縣南

漢書正誤按下充縣下云酉原山西水所出南至沅陵入

沅酉水入沅不入湘——乃酉水所經非所出之地應劭

以為酉水所出東入湘誤也

義陵

常林——記項羽殺義帝武陵人縞素哭于招屈亭高祖聞而義之故曰——水經注縣治序溪最爲沃壤 通典今辰歸馬良率諸蠻所築也所治序溪最爲沃壤 通典今辰州澉浦縣本漢——縣 元和志漢改黔中爲武陵郡移理——卽今辰州澉浦縣也 大清一統志——廢縣在今辰州府澉浦縣南三里龍堆隴 按功臣侯表——侯吳郢高祖九年以長沙王柱國封卽此徐廣云一作義陽司馬貞遂謂義陽縣在汝南誤矣

鄜梁山序水所出西入沅

水經注序水出武陵郡——縣鄜梁山西北流逕——縣又西北入于沅序與敘通 輿地廣記澉溪水出鄜梁山

楚詞所謂入澉浦而遭迴兮迷不知吾之所如卽此水也

今水經澉水有二源一出龍潭在淑浦縣南一百二十

里當黔陽界有溪東流至巡檢司前匯而爲譚龍潭之水

由地中行者二里出而南流六十里鄜梁之水自東而始

入桶溪之水又六十里一源出龍灣在縣東二十里自頓

家山出匯而爲潭二水至縣前爲雙龍江經縣西三十里

下流入于沅江 方輿紀要澉水在今澉浦縣西三十里

一名澉溪又名澉州楚詞所謂澉浦也 大清一統志鄜

梁山在今澉浦縣東南一百五十里今名頓家山接寶慶

府邵陽縣界縣志云頓家山遠近賃茶者多佃于此故茶

以澉浦名澉水在澉浦縣南古名序水序亦作敘亦名序

溪又名雙龍江亦曰澱州源出頓家山西北流入辰溪縣南界江口入沅 水道提綱雙龍江卽澱水有二源南源曰龍潭河出龍潭司南山東源曰龍灣河出畚刀界北並西北流數十里而合又北流至澱浦縣城南折而西六十里爲小江口又西三十里爲大江口與沅江會
莽曰建平

恨山

孟康曰恨音恒出藥草恒山 晉書音義恨恒懇反 水經注夷水又東逕——縣故城南縣卽山以爲名也孟康曰音恒出藥草恒山今世以銀爲音也南一里卽清江東注矣 寰宇記故——縣城在今峽州長陽縣西六十五

里——在今峽州遠安縣境 方輿紀要——城在夷陵州長陽縣西六十五里地名同昌市恨音銀 大清一統志——故城在今湖北宜昌府長陽縣西——在縣西北八十里 漢書正誤據水經注恒山二字乃酈注之文謂孟康音恒今則音銀也恒山二字疑編書者因讀水經注而誤增 按說文玉篇廣韻皆有恨字無恨字然兩漢志及晉宋齊舊唐志并水經注並作恨則作恨者非也又有作狠者又因恨字而誤 又按太平御覽九百九十二藥部有恒山引廣雅曰恒山蜀漆也又引永嘉記曰恒山出松陽永寧縣又引本草經曰恒山一名元草味苦寒又引吳氏本草曰蜀漆葉一名恒山是恒山卽蜀漆之別名也

零陽

水經注澧水口口合零溪水水源南出——之山厯溪北注於澧 水又東逕——縣南 通典今澧州所理澧陽縣本漢——縣地有崇山卽放驩兜之所又慈利石門二縣亦——縣地又溪州大鄉三亭二縣亦漢——縣地元和志今澧州所理卽漢武陵郡之——縣地以在零水之北故名 荊州圖經——縣以界內有零谿水爲名 大清一統志——故城在今澧州慈利縣東 漢志正誤按水經澧水過——縣北注云零溪水源出——之山厯溪北注於澧水零水入澧不入湘應劭謂——縣零水所出東南入湘者誤也

充

元和志——縣故城在今澧州崇義縣東北一里 大清一統志——縣故城在今澧州慈利縣西二百四十里 酉原山西水所出南至沅陵、

屬本郡

入沅行千二百里

水經注酉水導源并州巴郡臨江縣故武陵之——縣臨江縣酉源山東南流逕黔陽故縣南又東逕遷陵縣故城北又東逕酉陽故縣南又東逕沅陵縣北又南注沅水關駟謂之受水其水所決入名曰酉口 今水經酉水源出四川酉陽經辰州府城西南五里東入于沅 方輿紀要酉

水源出酉陽宣撫司界東流入辰州府境經府西三里入沅水一名酉溪亦禹貢九江之一也漢志謂出一縣酉源山蓋酉水別流非卽此水也 大清一統志酉水源出永順府永順縣西北南流經縣西南又東南流入辰州府沅陵縣西北合會溪入沅一名酉溪又名北河 水道提綱北河有數源並出四川湖廣貴州三省交界之地東流入湖南永順府西界曰北河又東經保靖縣城北又東南經長州府城西南入沅江卽古之酉水也其水行五百餘里 歷山澧水所出東至下雋

屬長沙國

入沅

師古曰澧音禮

史記作醴

禹貢又東至于澧楚詞捐

余佩于澧浦

又沅有芷兮澧有蘭

鄭康成曰經言過

言會者水也言至者或山或澤也澧宜山澤之名

水經

澧水出武陵一縣西歷山東過其縣南又東過零陽縣北

又東過作唐縣北又東至長沙下雋縣西北東入于江注

云澧水自一縣東流茹水溫泉水臨零溪水九渡水注之

又東逕零陽縣澧陽縣溇陽縣入作唐縣又東逕安南縣

與赤沙湖水會又東南注于沅曰澧口蓋其支瀆耳又東

至長沙下雋縣西北東入于江澧水流注洞庭湖俗謂之

澧江口也

岳陽風土記據水經注澧水會于沅然後入

湖今澧水注于洞庭謂之澧口沅水注于洞庭謂之鼎江

口豈歲月之久遂遷變至此耶 史記索隱孔安國馬融
王肅皆以澧爲水名當得其實又虞喜志林以醴是江沅
之別流而醴字作澧也 通鑑地理通釋澧水出慈利縣
厯山東至辰州沅陵縣入沅注于洞庭 方輿紀要澧水
出岳州府澧州慈利縣西三千里之厯山經縣北又東逕
石門縣南至州城南謂之蘭江又東經安鄉縣華容縣南
而入洞庭湖 尙書地理今釋澧水出今湖廣永定衛西
厯山至岳州府安鄉縣南會赤沙河入洞庭湖 大清一
統志厯山在今澧州永定縣西北澧水源出于此東北流
逕慈利縣又東北流逕石門縣又東南流逕安福縣北又
東北流逕州南又東南流逕安鄉縣又東流入岳州府華
容縣南入洞庭湖 皇朝通志澧水有三源一源出湖南
桑植縣境一源出永順府西北大山一源出桑植縣之太
平鎮合流經安福縣西南又東南經永定縣南東流經慈
利縣西有九溪河自施南府東境宣恩縣會長東縣之霧
江經安福縣來會東流有鐵水河自長東縣來會經石門
縣南又東經澧州城南分爲二派一東北流有大江支津
自江陵縣西南合三江湖諸水自公安縣來會一支東南
流合石門縣之道溪水東流又分數支至安鄉縣西北羣
流並合有從河自常德府武陵縣來會又東分爲二派一
東南流入洞庭湖一東北流合公安縣東北之口連湖水
至華容縣西南境入洞庭湖 水道提綱澧水二有二源

南源曰上洞河出永順府治西北境大山北源曰兩家河出太平鎮舊定城北山兩源會于桑植縣城南又東南至安福縣城西北折而西南又東經永定縣南南岸卽天門山也又東北有天堂寺前水來注之自此曰陵江河東北流至慈利縣城西九谿河自西北來會又東北經石門縣城南又東經澧州城南新渡之北又東分爲二派一東北流一東南流至安鄉縣西北之西台羣流畢合又南經安鄉城西折而南又東分爲二派並入洞庭湖按沅澧不相通爲洞庭湖所隔也

過郡二

過武陵長沙二郡

行一千二百里

漢書地理志補注卷四十三

常熟 吳卓信 編纂

零陵郡武帝元鼎六年置

史記五帝紀舜南巡狩崩于蒼梧之野葬于江南九疑是為零陵 水經注——治故楚地漢武帝元鼎六年分

桂陽置太史公曰舜葬九疑實惟零陵郡取名焉 後書

安帝紀注——今永州也 方輿紀要——秦長沙

郡地漢初屬長沙國武帝元鼎六年置今永州府至廣西全州是其境 地理志稽疑——乃長沙桂陽之分郡而

晉志以為新開妄矣 漢書考異當云故屬長沙 按漢

——今湖南永州府之零陵寧遠二縣及道州寶慶府

之新寧縣及武岡州衡州府之衡陽縣又廣西桂林府之臨桂縣及全州皆其地

莽曰九疑屬荊州縣十

零陵營道始安夫夷營浦都梁洽道泉陵洮陽鍾武

零陵

本書五行志哀帝建平三年——有樹僵地三月卒自立故交口 又藝文志縱橫家秦——令信一篇難秦相李斯 元和志今永州灌陽縣本漢——縣地 舊唐書地理志——故城在湘源縣南七十八里 輿地廣記——城在今清湘縣南 大清一統志——故城在今桂林府全州北三十里州志云地名梅潭有舊城址濠塹尙存

俗稱改州

陽海山湘水所出北至鄱

屬長沙國

入江

海內東經陽朔山湘水出舜葬東南阨西環之入洞庭下郭注環繞也今湘水出——營道縣陽朔山入江洞庭地穴也在長沙巴陵今吳縣南太湖中有包山下有洞庭穴道潛行水底無所不通號爲地脉 應劭曰湘水出零山 續郡國志零陵陽朔山湘水出 水經湘水出——始安縣陽海山東北過——縣東注云陽海山卽陽朔山也 應劭曰湘出零山蓋山之殊名也山在始安縣北故——

之南部也湘灘同源分爲二水南爲灘水北則湘川東北
過——縣東越城嶠水注之又逕——縣南又東北逕觀
陽縣東與觀水合又東北逕洮陽縣東又東北逕泉陵縣
西 羅含湘中記有營水洮水雍水祁水宜水舂水烝水
表水來水淥水連水倒水瀉水泊水資水皆注湘湘水至
清雖深五六丈見底了了湘水之出于陽朔則觴爲之舟
至洞庭日月若出入于其中也 元和志陽朔山在全義
縣東南入十里卽零陵山也湘水出此 寰宇記陽海山
在郡城北一百七十里屬興安縣一名陽朔山其山自永
州——縣西迤邐岡巒連亘不絕此山卽湘灘二水之源
地理通釋湘水出全州清湘縣陽朔山東入洞庭北至

衡州衡陽縣入江太史公浮沅湘卽此 明統志湘江流
至湘口與瀟水合水至清雖十丈見底中有穴名大瀆每
春夏江漲數百步外皆奔入穴中有聲如雷 今水經湘
江源出廣西興安縣海陽山下西北流至分水嶺分爲二
派曰灘水流而南曰湘水流而北合越城嶠水至全州又
合洮灌二水經東安縣盧洪江來注之至永州府城西南
承水來入之又東北入永州府界至湘口與瀟水合曰瀟
湘經永州府城北一十里又東經祁陽西北祁水東流來
注之經常寧縣西舂陵水從東來注之至衡州府城東與
蒸水合曰蒸湘至衡州府城東北郴江來注之又東流入
長沙界至于陵江口攸水西流來注之又北瀉水從東注

之又北漣水東流來注之又北過長沙府西瀏水從東來注之又北瀉水從西南來注之又北過湘陰縣汨水西流來注之又北至沅江縣與沅水合曰沅湘會眾流以達于洞庭 方輿紀要海陽山在今桂林府興安縣南九十里本名陽海山俗曰湘灘二水皆出于此陽朔山在陽朔縣北隋置陽朔縣以此湘灘二水不出此山也 又云湘水在興安縣南海陽山其初出處曰靈渠流五里分爲二派流而南者爲灘水流而北者曰湘水灘離也言違湘而南湘相也言有所合也湘水東北流入衡州府境又東北流入長沙府境過湘陰縣西又北而達青草湖注于洞庭湖 又云湖嶺之間湘水貫之無出湘之右者凡水皆會焉

自全州至永州北與瀟水合曰瀟湘歷祁陽合桂陽諸水至衡州北與丞丞合是爲蒸湘經湘陰入洞庭與沅水合 又曰沅湘此卽三湘也 大清一統志陽海山在興安縣南九十里據後漢志及水經注皆以陽海山爲陽朔山而應劭及元和志又以爲零陵山蓋陽朔卽陽海之殊名非今陽朔縣之陽朔山也零陵乃漢時陽朔山所在之郡應劭蓋謂湘出零陵郡之山非陽朔外又別有零陵之稱也 又云湘水自廣西全州流至黃沙河入永州府東安縣境一百七十里至石期市入零陵縣境又東北七十里至湘口合瀟水北流一百四十里入祁陽縣境又東北入衡州府常寧縣西北界又東北入衡陽縣又東北入衡山縣

東界又北入長沙府湘潭縣界又北流四十里至善化縣境又七十里至長沙縣境一百里入湘陰縣境又四十里至湘陰縣南陰繞西門又一百三十里合于青草湖 皇朝通志淮水源出廣西桂林府興安縣南曰海陽江北流分爲二復合有六洞山水自湖南城步縣來會又東北始名湘江經全州城西南有羅水自湖南新寧縣界來會有灌水自灌陽縣來會又東北入湖南界經東安縣東南有右江來會經永州府治零陵縣西北有瀟水自道州合永明江華寧遠三縣諸水名曰泥江經府城西來會北流經祁陽縣西有盧洪江自東安縣來會經常寧縣北有□□□□□□□□嘉禾新田桂陽州來會經衡州府治□

□□□□有烝水來會北流有郴江□□□□□□□□興寧郁州永興諸水來會經衡山縣南有沫水合攸水自鄱縣茶陵州攸縣及安仁縣之小江來會又北有水自衡山來會又東北有淶江合泗汾河自醴陵瀏陽合江西之萍鄉萬載縣諸水來會經湘潭縣東南有漣水自湘鄉縣來會經長沙府治善化縣西南有瀏陽河自瀏陽縣來會稍北有黃泥江自東北來會又北有瀉河自寧鄉縣來會又北有資江自益陽縣合武岡州新寧邵陽新化安化諸縣水分支經湘陰縣沅陵縣先後入洞庭湖其正支東流來會經湘陰縣西南有汨水自平江縣合諸水分流來會湘水分二派復合入洞庭湖 水道提綱湘水源出廣

西桂林興安縣南之海陽山東北流合諸水至全州城西
南曰湘江又合諸水東北流曰合江又東北入湖南界經
東安縣東南折東北至永州府治零陵縣西北有瀟水曰
泥江自府城西北來會水始盛大故稱湘江也又北流至
祁陽縣西南又東北至常寧縣北又北經衡州府衡陽縣
東折西北至東江北又北有郴江來會曰耒口又北至衡
山縣有洙水來合攸水來會曰茶陵又北有淶江合泗汾
河會江西萍鄉諸水來注之又北至湘潭縣又北有茶園
水來會又北有涓水來注之又北有漣水來注之又北至
長沙府善化縣西南又東北經府城西南又東北有瀏陽
河來注之曰瀏口又西北資江合諸水來會曰喬口又東
北流至湘陰縣西南折東北有汨水合諸水來注之曰汨
羅口又東北至磊山洲分爲二派又北復合入洞庭湖曰
湖口自源至此行二千餘里

過郡二行二千五百三十里

過零陵長沙二郡

又有離水東南至廣信

屬蒼梧郡

入鬱

舊作入鬱林誤

行九百八十里

本書武帝紀元鼎五年秋遣歸義越侯嚴爲戈船將軍出

——下離水徐廣曰離水在——通廣信 水經離水亦出陽海山南過蒼梧荔浦縣又南至廣信縣入于鬱水注云離水與湘水出一山而分源也湘離之間陸地廣百餘步謂之始安嶠卽越城嶠也嶠水南流注于離名曰始安水又南逕始安縣東又東南流入熙平縣又西逕平樂縣左合平樂谿口又合瀨水上有離水關又南至廣信入于鬱 元和志桂江一名離水經臨桂縣東去縣十步楊朴平南越出零陵下離水卽謂此也 柳開湘離二水說二水本一水也自陽海山西北流至縣東五里分水嶺始分爲南北二水蓋昔人以二水相離故命之曰相曰離後人又加水云 方輿勝覽離水合東川以至梧灘瀧三百六

十至昭而中分自昭而上至靜江不甚陰惡自昭而下至梧多銳石灘高而水湍急 今水經離江源出廣西桂林府海陽山流五里分爲二北爲湘水南爲離水離江至臨川縣東北銀江入之東南流至桂林府城南陽江入之又南合相思江又南經平東府城南又合荔水至梧州府城西入于廣江 方輿紀要離江與湘江同源出桂林府興安縣海陽山東北流至興安縣北醜爲二流離水則從靈渠南出繞桂林府城而南流今自靈川縣而南亦曰靈江又曰融江入桂林界亦曰桂江亦曰始安江又經陽朔縣東而入平樂府界亦名府江自平樂而南經昭平縣西以入于梧州界至梧州之西北仍曰桂江亦曰離江南流過

府城西合于左右二江謂之三江口 大清一統志灘江源出桂林府興安縣陽海山至漢潭與眾流匯乃分湘灘二流南流為灘水南由靈渠經靈川縣東北會象水南注府城繞城東北流名桂江又南經陽朔縣東入平樂府城南名府江又南經昭平縣東又南入梧州府蒼梧縣西北入大江 皇朝通志桂江即灘水源出廣西桂林府興安縣南北流至縣東南為分湘灘灑折西南有銀江自靈川縣北境來會經縣東南至府治臨桂縣北分而復合有馬溪來會西南流有相思江合永寧州永福義寧縣諸水來會經陽朔縣東北有縣溪來會經平樂府北有龍江自恭城縣來會又南有荔水自荔浦合修仁縣之修江來會經

永安州東北又經昭平縣北有金芝巖東水來會又東南有蒼梧縣水來會至梧州府城西黔江營江來會東流至廣州府貪瀆江龍川江入于海 水道提綱桂江即古離水亦曰灘江與湘水州源而分流南北者也源出桂林府興安縣南之海陽山北流曰海陽江至縣東南遂北為分湘灘灑其東北經全州至湖南北入洞庭湖者湘江也灘江自分湘灘灑北流十餘里經縣城東北折而西抱城北而西南流經靈川縣城東南又西南經府治臨桂縣北境分為二派復合于城東南流二十里會馬溪相思江又東南折西南經陽朔縣東北折東南經縣城東北又經平樂府北又南至府城西北會龍江又南經府城西南荔水東

北來注之又東南經永安府東北又南經昭平縣北又南經縣城東南又南經梧州府城西而潯州府所合之黔江鬱江並自西南來會東流經城南又東入廣東界東南至廣州府會滇江龍川而入南海 地理志稽疑灘水一名融水乃牂柯江之下流分鬱水豚水諸川入于交州復至中上歷三十六灘而為灘水本無關於湘水其引湘水而通之者秦史祿運漕之故也故湘灘所以運專在於零渠水經不知遂謂湘灘同源其實非也

營道

水經注營水又西逕——縣馮水注之馮水又逕——縣西右注營水營水又西北屈逕——縣西 通典今道州

所理營道縣漢舊縣有營山因以為名 輿地廣記營水出論臨道縣西流逕九疑山下又西經——縣又折而東北經營浦縣又東北注于湘 方輿勝覽——山在今道州西四十五里其始名曰營陽又曰南營又曰洪道 方輿紀要營水在今道州城西源出營山繞流六十里與江華縣之池水合又與瀟水會同入湘水 大清一統志——故城在今永州府寧遠縣西營水在縣南 又云營水自道州以上今謂之沱水自道州以下今謂之瀟水 又云瀟水雖自古並稱然漢志水經俱無瀟水之名唐柳宗元愚溪詩序始稱瀟水上然不詳其源流宋祝穆始稱瀟水出九疑山今細考之惟道州北出瀟山者為瀟水其下

流皆營水故道也至穆所謂出九疑山者乃水經注之泠水北合都溪以入營者也蔣本厚零陵山水志云瀟水有三支一支出江華一支出永明一支出濂溪惟出濂溪者猶爲近之出江華者乃以掩水爲瀟水出水明者乃以掩水爲瀟水蓋後人以營水所經統謂之瀟水而遂不知有營水矣

九疑山在南

史記五帝紀舜南巡狩崩于蒼梧之野塋于江南九疑是爲零陵 又始皇紀三十七年十一月行至雲夢望祀虞舜于九疑山 本書武帝紀元封五年冬行南巡狩至于盛唐望祀虞舜于九疑應劭曰舜葬蒼梧九疑山名今在

零陵——文穎曰九疑山半在蒼梧半在零陵師古曰嶷音疑其山九峰形勢相似故云九疑山 淮南人間訓始皇使尉屠陸發卒五十萬爲五軍一軍守九疑之塞 又云九疑之南陸事寡而水事多 說文九嶷山舜所塋在零陵——海內南經蒼梧之山帝舜塋于陽丹朱葬于陰郭注蒼梧山卽北疑山也禮記亦云舜葬蒼梧之野竹書亦曰后稷放帝朱于丹水 皇覽舜冢在零陵營浦縣九疑山 韋昭國語注舜葬九嶷其山體水旋其邱下故壅漢水使泉石槲以象之 荊州記九疑山盤墓數郡之界連峰接岫競秀爭高舍霞卷霧分天隔日 湘中記九疑山在——縣九山相似行者疑惑故曰九疑 營陽郡

記九疑山下有舜祠故老相傳舜登九疑 水經注營水出營陽冷道縣南營山西流逕九疑山下盤基蒼梧之野峰秀數郡之間羅巖九舉各導一谿岫壑負阻異嶺同勢遊者疑焉故曰九疑山大舜窆其陽商均葬其陰山南有舜廟山之東北冷道縣界又有舜廟縣南有舜碑 括地志九疑山在永州唐興縣東南一百里 元結九疑山記山方二千餘里四州各近一隅世稱九桐峰以望而疑之謂之九疑通作疑 寰宇記帝舜陵亦名永陵自古禁樵採置守陵戶 方輿勝覽九疑山在今道州寧遠縣南六十里亦名蒼梧山 方輿紀要九疑山在永州府道州寧遠縣南六十里衡郡志云山在衡州府桂陽州藍山縣西

南五十里蓋山接衡水之界也 大清一統志帝舜陵在今寧遠縣東南

莽曰九疑亭

始安

裴氏廣州記五嶺一名始安 水經注湘灘之間陸地廣

百餘步謂之——嶠即越城嶠也嶠水南流注灘謂之——

水 元和志今桂州臨桂全義靈川陽朔永福理定慕

化七縣皆漢——縣地 寰宇通志今桂林府臨桂縣本

漢——縣地——嶺在府城西一里圖冊云秦時開五嶺

此其一也 大清一統志——故城即今廣西桂林府治夫夷

王子侯表——敬侯義武帝元朔五年以長沙定王子封

宋書州郡志扶縣漢舊縣曰——今云扶者疑是避桓

溫父諱去夷文不可為縣名故為扶云 水經資水東北

過——縣注云夫水出縣西南零陵縣界少延山東北流

逕扶縣南本零陵之——縣也 後書第五倫傳注——

故城在今邵州武岡縣東北 寰宇通志——故城在今

武岡州城東北二百四十里——水在新寧縣南源出廣

西全州界流入境至邵陽會資水 大清一統志——故

城在今寶慶府新寧縣東北縣東七里有石幕巖巨石覆

空如幕綿亘里許——水經其下 水道提綱羅江即古

——水源出新寧縣南與廣西界之羅江巖北流折東北

經縣城南又東北又北折東北曲流一百五十里會資水

營浦

營陽郡記——縣南三里餘有舜南巡止宿處今立廟

水經注營水又東北逕——縣南吳營陽郡治也 元和

志今道州宏道縣本漢——縣 方輿紀要——廢縣在

今道州永明縣西 大清一統志——故城在今永州府

道州北舊志云在州北營陽鄉地名大漢

都梁

盛宏之荊州記縣西有小山山上有渟水既清且淺其中

悉生蘭草俗謂蘭為——山因以為號縣受名焉 通典

今邵州武岡縣本漢——縣地 元和志——山在武岡

縣東北一百三十里 輿地紀勝——故城在郡城東五里 方輿勝覽今武岡山東五十里有漢——故城——水出縣西南百里與邵水合 寰宇通志——故城在寶慶府武岡州城東五里——水出州城西南會夫夷水入洞庭 方輿紀要——山在武岡州西百里山極高聳泉流環繞漢以此山名縣——水出焉東北流合夫夷水資水 大清一統志——故城在今寶慶府武岡州東北侯國 王子侯表——敬侯遂武帝元朔五年以長沙定王子封路山資水所出東北至益陽 屬長沙國

入沅

水經資水出零陵——縣路山東北過夫夷縣又東北過邵陵縣之北又東北過益陽縣北又東與沅水合于湖中東北入于江也注云資水出武陵郡無陽縣界唐糾山蓋路山之別名也謂之大溪水東北逕武岡縣南建興縣南又逕——縣南邵陵縣南臨大溪謂之邵陵水又東北出孟陽縣逕流山峽名爲茱萸江蓋水之變名也又東逕孟陽縣北又東北入洞庭湖所入之處謂之益陽江口 今水經資江有二源一出澱浦與靖州綏寧之澗谷間一出廣西全州界經新寧縣南爲夫夷水至武岡合流東下又——水出武岡州城西南來注之經寶慶府城北邵水入

之資江自寶慶過祁陽縣北經安化縣西凡五百餘里至益陽縣南過沅江縣入于洞庭湖 方輿紀要澧水出靖州興寧縣東南唐糾山東北流經寶慶府武岡州與邵水會或謂之邵江北流入長沙府安化縣境又東北出孟陽縣南寧鄉縣北而入常德府沅江縣注洞庭湖 大清一統志唐糾山在寶慶府武岡州西南一百里接靖州綏寧縣界一名路山資水今名資江源出唐糾山東北流逕邵陽縣又北流入新化縣又北流入長沙府安化縣西北名邵河又東北經益陽縣南曰益陽江又東北至常德府沅江縣界入洞庭湖其支流又自沅江縣東流至湘陰縣界入湘 水道提綱資水即都梁水源出武岡州西南東流

稍北經州城南又東北又東南又曰東紫陽江經寶慶府治邵陽縣西南境有羅江合諸溪水來會水勢始盛又東北經府城北流數十里有五十三灘邵水自城東來會又有四十八灘又東折而北又折而西又西北經新化縣城東北又西北折而東北經安化縣西又東北至縣東北又東經益陽縣西曰資江又東至益陽縣南分為二派又析為數支或入洞庭湖或入湘江源流約千七百里

過郡二

過零陵長沙二郡

行千八百里

冷道

師古曰泠音零 按說文竹部瑄字下引作伶道又東二稱伶人左傳亦作泠盖泠伶古字通 應劭曰泠水出丹

陽宛陵西北入江臣瓚曰宛陵在豫章北界相去三千里又隔諸水不得從下逆至一一而復入江也 水經注都

谿水西北流逕一一縣北與泠水合泠水南出九疑山北流逕一一西南縣指泠溪以為名又北流注都谿水又西

北入營水 通典今道州延唐縣漢一一縣屬零陵郡有春陵鄉元帝徙于南陽郡蔡陽鄉 元和志今道州延唐

縣本漢一一縣地漢景帝時零陵文學于一一舜祠下得玉瑄是也泠水今名遲水源出九疑山 寰宇記今道州

寧遠縣本漢一一縣地故城在縣東四十里 大清一統志一一故城在今永州府寧遠縣東泠水在縣南一名一一水今謂之瀟水

莽曰泠陵

泉陵

王隱晉書一一縣北部東五里有鼻墟象所封也 水經

湘水又東北過一一縣西 水經注營水又西北逕一一縣西零陵郡治也 後書章帝紀注一一故城在今永州

零陵縣北 元和志今永州零陵縣本漢一一縣地又祁陽灌陽二縣亦一一地 舊唐書地理志一一故城在今

永州北二里 大清一統志一一故城在今永州府零陵縣北

侯國

王子侯表衆陵節侯賢武帝元朔五年以長沙定王子封
按王莽傳有——侯劉慶上書令莽行天子事師古曰
王子侯表衆陵節侯即此——也此傳及翟義傳並云——
地理志——屬零陵郡而表作衆陵誤也

莽曰溥潤

水經注作溥潤

洮陽

如淳曰洮音韜 索隱曰音滔又音道 王子侯表——

靖侯狩燕武帝元朔五年以長沙定王子封 水經湘水

又東北過——縣東 水經注洮水出——縣西南文山

東北逕其縣南縣即洮水以立稱矣其水東流注于湘水

後書章帝紀注——故城在今永州湘源縣西北 元

和志今永州湘源縣本漢——縣地 寰宇記漢——縣

在湘江之西岸 輿地廣記——故城在今清湘縣西北

方輿勝覽洮水在今全州清湘縣北五十里出文山南

流入湘江水北為陽故漢置縣以——名 胡氏通鑑注

漢高追英布于洮水南即此 方輿紀要——廢縣在今

全州北三十五里漢置縣以洮水經其南而名洮水在州

西十里源出文山舊志云山下出泉噴激有聲因名 大

清一統志——故城在今桂林府全州北州志云在州北

三十五里地名改

莽曰洮治

鍾武

應劭曰永建三年更名重安 水經注湘水又東北過重安縣東承水從東南來注之注云承水出重安縣西邵陵縣界邪薑山東北流至重安縣又東北逕重安縣南漢長沙頃王子度邑也故零陵之——矣武水入焉水出——縣西南表山東流至——縣故城南又東北流至重安縣注于承水 晏殊類要——故城在衡陽縣西八十里 大清一統志——故城在今衡州府衡陽縣西南按水經注武水東流至——縣故城南又東北流至重安縣是後漢時已徙縣治重安尙在——之東北今其地不可考

莽曰鍾桓

律